

先聖廟林記

大門全泮郡外森列之清番禺屈大均翁山著

自兗州東北三十里至曲阜縣縣闕里也有二石闕故名蓋里門也或謂少昊所都故曰闕然少昊當時未有宮殿則亦未有闕也史稱魯煬公築茅闕門或以是然闕里本在陬昌平鄉孔子生於陬陬城西界有闕里其後孔子長徙居曲阜仍稱闕里不忘所生之地也廟在曲阜城中乃夫子故宅史所稱藏夫子平生衣冠琴車書於壽堂者也廟南向門三中曰大成左金聲右玉振

前有朝閣五中大閣榜曰奎文殿中像垂旒而端笏者素王也素王之稱予謂不如魯哀公稱尼父之爲尊蓋孔子猶天不可得而謚稱曰尼父則所以尊夫子至矣父者天之謂也以天爲父而所以稱天者至以夫子爲父而所以稱夫子者至稱曰素王其亦何以加於夫子乎像前有銅犧一銅象一銅尊一鐫曰漢元和二年祭器簷亭一碑曰杏壇壇北有子路捨丁石石之鑿也自大門至此栝柏森森多數百年物而壇東南隅一檜側指皮如銅鐵而色殷膚文隱起如索綯左者左紐右者

右纏高四丈有奇圍三尺乃夫子手植之物自周迄元至元三十一年三枯三榮其枯必兆禍亂其榮必生聖人歷歷可考今之槎枒一幹而未能再鬱葱也其猶剝之碩果耶天地之心萌芽於下俟雷動而後發育吾知其必有日矣後一殿爲元宮夫人位又後一殿曰聖蹟有石刻夫子全像及周流列國之圖殿右爲啓聖王像亦垂旒端笏後一殿則顏夫人位其前有金絲堂魯恭王聞樂於此故名此孔廟之大略也廟大門東有衍聖公府其堂曰詩禮旁則四氏弟子有學焉自縣之北出

圭門四里許度橋至漸門門與圭門相直是爲孔林輦路廣十餘丈有石闕六楹其左有孔彪韓勅二碑韓勅碑與禮器碑皆爲漢隸第一摩挲久之石表石人各二石獸四獸作仰號之狀三蹲一立甚奇古後漢永壽元年魯相韓叔節所造或以前二爲角端外一立者狀若抵觸爲神羊內一爲駁馬人則方相之類左執笏右者帶劍皆古衣冠越數里紅牆繚繞悉在松柏陰中第三坊有樓觀臨之下有篆曰至聖林入坊而東稍北有洙水橋洙水橫穿林中經夫子墓前數十步乃出林水甚

小一溝瀆耳古所謂洙瀆是也春秋莊公九年冬浚洙洙水小冬輒乾涸故浚之然今竟絕流水經注所謂西合於泗水者不可見矣或以爲似古魯城之隍非泗水分流者故浚之未知然否橋里許有享殿亦曰思堂堂後一楷樹高三丈五尺圍四尺子貢獨居時所植者也楷與檜生意皆存而檜之榮茂獨與興王相應此梁木也萎而不萎蓋夫子之元氣在焉昔人言仲尼元氣顏子春生元氣者乾道之變化正其性命而可以各正萬物之性命太和之所保合故久而復榮顏子春生其道

學海類編  
三  
遊覽  
爲復故爲乾之長子子貢與諸賢有復有不復徵諸草木而可以見其仁之所至矣述異記言曲阜有顏回墓墓上石栴二株大三四十圍枝葉暢茂土人云顏子手植之木蓋亦於檜具體而微者乎從楷樹折而西上爲子思墓東上少南爲伯魚墓西折而稍上則夫子冢冢高一丈二尺有漢刻石又有宋刻文曰至聖文宣王墓石在漢石之前其壇石厚可三尺方亦如之縱橫各七數共四十有九亦韓叔節所造弟子舊於冢前以甒甕爲祠壇方六尺許與地平故叔節易之以石也子思墓

前二石龕徑三寸深半之居攝元年二月所造其石案石鑪在夫子冢前者元至治二年祭器也有銘存焉墓西一室爲子貢廬墓之所史稱孔子沒弟子心喪三年既畢乃相訣而去或復留則廬墓者不止一子貢子貢則六年也子貢當時實主喪故將歸而入揖之其後子貢歸而弟子及魯人往從冢而家者百有餘室因名曰孔里斯亦因子貢而興起者也史又稱魯世世相傳以歲時奉孔子冢而諸儒亦講禮鄉飲大射於孔子冢當夫子沒之明年爲魯哀公之十有七年哀公因所居堂

弟子內爲廟在魯城西南隅歸德門之內而學者當時  
惟以冢爲歸依依不舍司馬遷云子適魯觀先聖廟堂  
車服禮器諸生以時習禮於其冢是也冢今作家非也  
其時家已爲廟堂久矣冢地甚寬孟子之所謂場故可  
以習禮也中凡廣十里伯魚子思二墓相去十步許規  
制甚小蓋皆馬鬣之封夫子則若堂矣孫毓所謂孔子  
墳四方前高後下形似臥斧高八九尺者是也然當時  
子夏等行夫子之志三斬其板而止僅高四尺如防墓  
後人增益之故今高一丈二尺耳古木多不可名皆弟

子四方之植其合抱者舊有十餘萬章多柞枌雒離女  
貞五味龜檀之屬下無刺人草上無鳥巢洵可異也墓  
西北有白兔溝二白兔石也似兔非兔狀亦怪記稱秦  
始皇伐林墓得虛墓五閒皆石爲之堅不可動有白兔  
出其中逐之而沒遂不敢發故後世爲白兔以守之溝  
本在曲阜西八里此亦以名此孔林之大略也林東三  
里有講堂在洙北泗南又有研臺井卽刪述之所自衛  
反時居此皇覽謂諸弟子房舍井食猶存漢光武嘗坐  
其中是也斯地也中據二水之勝而馬鞏山別委三峰

於前如筆架然又乃天造地設之奇故爲斯文所根本  
羲皇畫八卦於始夫子修六經於終皆在此地數里之  
內蓋泰山之靈秀所會者也五嶽惟泰山南面故爲天  
地之長男五嶽之宗伯其正脈所分爲尼山以盤礴於  
闕里之東南者亦皆南面有向離之象故爲天下之文  
明噫嘻奠中國之神皋也哉尼山有五峰相連曰五老  
峰夫子始生之夕五老降庭五老者五星之精也故峰  
名五老中峰尼邱最高其顛如玉屏而微窳其半故孔  
子項如反盂所謂首上圻是也維嶽降神竝其形而與

之矣尼山之東三里爲顏母山其西五里爲昌平山是  
爲尼山之內翼其外羣山縣絡在南者爲鳧爲嶧爲九  
龍在東者爲如溝爲陪尾爲蒙爲夾谷在東南者爲防  
在東北者爲臨樂在北者爲梁父爲云云爲亭亭爲介  
邱爲徂徠爲龜爲石門是爲尼山之外翼而九仙山爲  
小屏泰山爲大屏其西廓然淺壟平阜依稀環抱若宮  
牆若城郭周遭數十百里望之不窮論者謂凡山皆發  
崑崙至爲都會山必西峙水必東流闕里之山環北東  
南三面而沂水出於尼山逕闕里之南西流匯於達泉

學海類編 卷之六 遊覽  
溢於雩水行七十里入於泗洙水出臨樂山西北流浮  
於孔林入於沂泗水出於陪尾逕闕里之北百里強折  
而南會於沂入於濟汶水有三源其出於仙台原三寨  
村者皆西流合於泰安之下又西流六十里合徂徠源  
之小汶河注於洸而南入於濟是則山水皆逆矣山水  
皆逆使中原之氣脈盤旋而不直下以爲生聖生賢之  
本其與易之逆數相合乎王充云孔子當泗水而葬泗  
水爲之卻流蓋反而朝宗之意亦一逆也斯地也山水  
之靈異蓋路史所云空桑又曰兗鹵也其地廣絕高陽

氏所嘗居皇甫謐以爲廣桑之野者也春秋演孔圖云  
徵在遊於大豕之陂夢黑帝謂曰汝產必於空桑干寶  
云徵在生孔子空桑之地令名孔竇在魯南山之穴南  
山者尼山也穴在尼山之西卽坤靈洞也洞有三門其  
中一室廣可兩楹有石牀石枕石几皆天成卽孔竇也  
孔竇一作空竇而竇或作瀆與顏母井不遠魯相史晨  
勅瀆井復民飾治桐車馬於瀆上擬守井舍吏四人又  
其碑云伏念孔瀆顏母井去市道遠是也大豕者或少  
昊之陵也少昊陵在防山之北而空桑在防山之南昌

平鄉一帶皆其處也然山海經云空桑之北有軒轅山  
軒轅山者必闕里之東北壽邱也考黃帝生於壽邱其  
旁今有景靈宮焉實祀黃帝然則黃帝素王皆生於空  
桑蓋不止一伊尹也然素王之稱者何傳曰水精之子  
繼衰周而爲素王水精者黑帝也孔子稟黑帝之精以  
水德王在易爲坎之德坎在艮下其象曰山下出泉蒙  
夫子應蒙象而爲師坎之水則沂之深也艮之山則尼  
邱之高也童蒙之吉則顏曾之賢也噫嘻惜乎吾不及  
其時執經問業與諸子揖讓於其閒履斯遺迹其安能

已於低徊而不能去也哉

日  
行  
分  
時  
入  
途  
在  
途  
中



山左筆談

明 嘉定黃淳耀蘊生著

濟河在汶上北云卽大清河禹貢出於陶邱北又東至  
於河又東北會於汶又北東入于海酈道元謂濟水  
當王莽之世川瀆枯竭伏地而行蔡九峰謂今歷下  
凡發地皆是流水世謂濟水經流其下故今以趵突  
當之然趵突又引入小清河則大清河乃濟之故道  
非濟之本流世閒水惟濟最幻卽其發源處盤渦轉  
轂能出入諸物若有機者然昔人以糠試之云自趵

學海類編  
卷之八  
遊覽  
突出

大明湖下有源泉又爲諸泉所匯當城中地三之一古稱遙望華不注如在水中夏時荷菱滿湖葦荻成港汎舟其中景之絕勝者惜沿湖無樓臺亭榭以助憩息城中泉最多如金線錢南北兩珍珠泉舜泉杜康泉趵突泉總之趵突佳入城與諸泉俱匯大湖出北門達小清河

山左士大夫恭儉而少干謁茅茨土階晏如也卽公卿家或門或堂必有草房數楹斯其爲鄒魯之風

古稱封禪者七十二君今遺蹟皆不存亭亭云云等存其名而已秦岱之上惟日觀側有秦封禪臺碑石列秦無字碑最古當萬年不化大且重故此石非大山物非驅山之鐸良不能至此

泰山香稅乃士女所捨物藩司於稅賦外資爲額費夫旣已入之官則戴甲馬呼聖號不遠千里十步五步一拜而來者不知其爲何也不惟官益此數十萬眾當春夏閒往來如蟻飲食香楮賈人旅肆咸藉以爲生視嵩山廬岳鴈蕩武夷士大夫車騎館穀專爲邑

學海類編 卷之三 山左筆談 三  
中之累者其損益何啻星淵大夫車禍前毀車為邑  
大清河濟水之故道經流長清齊河歷城濟陽城東武  
定青城濱州蒲臺利津入海小清河一名灤水即濟  
之南源發趵突東北經章丘鄒平新城高苑博興樂  
安入海今亦為鹽河兼資灌溉而淤塞流溢久離故  
道水利失而水害興各郡邑乃自以意為隄而以鄰  
為壑如新城博興高苑之民日尋干戈以競通塞非  
朝夕故矣故為山東者必當興復河流講求故道使  
竹口不闢則西民之水害不除清河不修則東民之

水利不舉恐田野荒蕪終無殷富之日

孔子廟前之檜圍不四五尺高與簷齊而志稱圍一丈  
三尺高五丈者志所稱舊檜也此非手植乃手植之  
餘蓋手植者金時燬於火此其根株復萌槩者志稱  
晉永嘉三年枯隋義甯元年復榮唐乾封二年枯宋  
康定元年復榮則所指手植者元至正三年復榮則  
指今檜也今膚理猶然生意第不知榮於何日耳

洙泗洙水自尼山來入沂水同流今之洙水橋亦非其  
舊也泗水出陪尾山下四源共會故稱泗其源清澈

可掬出地激駛滾滾有聲至曲阜南洙北泗中爲孔  
林下濟甯入徐州會汴達淮今會通河奪之雷澤夏  
溢秋涸涸時水入地聲雷者經日故云雷澤汶水會  
七十二泉而成至南旺分流南北濟運南流短而北  
流長

周公之後有東野氏有司復其庸調世疑孔子萬世有  
土而周公微不振然孟子出孟孫氏自是周公子孫  
山東東兗二郡水患不盡由本地本地水乃汶泗也流  
漕河南北則已惟中州黑洋山水經澶淵坡而東奔

曹濮之間以一隄限之隄西人常竊決隄乘以黑龍  
潭諸水泮泮汪洋其初咸自范縣竹口出五空橋而  
入漕河邇來橋口淤塞河臣不許浚之出恐傷漕水  
遂縮回浸諸邑而濮尤甚相其地彩正開州永固鋪  
一路可開之以達漳河竊恐開民未心肯耳然東不  
開五空橋西不開永固鋪濮上左右歲爲沮洳之場  
矣

東兗之間郡邑大小不等如滕非昔五十里之滕也西  
北可五十里南則幾百數十里而遙東亦不下百里

而岡阜縣連盜賊淵藪故治之難而滕嶧閒再置一  
東邑爲善若清平之側又有博平朝城之畔又有觀城  
則贅也博平四隅鄉村每方不出二十餘里若觀城  
東西北皆不過數里止東南去十里餘而已此猶不  
及一大郡之城何以爲邑  
鄒嶧山秦始皇所登以立石頌功德處一山皆無根之  
石如溪澗中石卵堆疊而成不甚奇峭而頗怪險禹  
貢嶧陽孤桐乃特生之桐非以一樹爲孤也桐必特  
生者謂受風聲耑故堪琴瑟今則枯桐寺前果只畱

一桐足稱孤矣

東平安山左右乃盜賊淵藪客舟屢遭劫掠武德亦多  
盜之地以北直河南三界往來易於竄匿然其來也  
必有富家窩引之

青州人易習亂禦倭長鎗手皆出其地蓋是太公尊賢  
尚功桓公管仲首霸之地也其走狗鬪雞踔躑六博  
之俗猶有存者

登州三面負海止西南接萊陽出海西北五六十里爲  
沙門島與鼉磯牽牛大竹小竹五島相爲聯其上生

奇草美石遙望紫翠出没波濤中足稱方丈蓬壺春  
夏閒蛟蜃吐氣幻爲海市常在五島之上現則皆樓  
臺城郭亦有人馬往來近看則無止是霞光遠看乃  
有真成市肆此宇宙最幻境界秋霜冬雪肅殺時不  
現而蘇子瞻乃禱於海神歲晚見之亦神愛其人乃  
成此奇緣也海舟度遼者必泊諸島避風然泊者不  
知而登遼兩岸乃儼然覩形影真不可以常理斷  
長山沙門諸島在登萊外大者延袤十餘里小者二三  
里皆有饒沃田以千萬計猶閩浙之金堂諸山也往

者皆有禁後鄭中丞因新兵乏餉疏墾以助之亦山  
左一益此田皆當於農時搭廠以居隙則毀之而歸  
若架屋常住恐窩引海寇爲患浙閩閒矣

海運洪武十三年糧七十萬石給遼東永樂五年因都  
北平部議糧運事宜未決九年以濟甯州別駕潘叔  
正言命宋司空禮發山東丁夫十六萬浚元會通河  
濟甯至臨清三百八十里以漕然猶海陸兼運十二  
年議於淮徐德通搬遞爲支運繼乃爲兌運又爲改  
兌其後河塞決不常曾有疏請試海運者非遂以海

學海類編 卷之六 遼東  
代漕也不過欲爲國家另尋一路以爲漕河之副耳  
竟格于文網而止只今朝鮮多事恐此海道他日爲  
倭彝占用而中國不敢行今自登州東南大洋至直  
沽詳其路道以備撫採自元真島始元真島者大嵩  
靜海二衛之東南洋也海船至此轉杵鳧嘴如收洋  
入套一程北過成山頭西北望威海山前投劉公島  
二百餘里用南風爲順風一日而到內可灣泊十處  
當迴避十處二程自劉公島西行遠望芝罘島約二  
百里用東風東北風半日而到內可小灣泊四處迴

避四處三程自之罘島開船西六十里過龍洞直西  
此備倭府外洋也遠望長山島西投沙門島約一百  
八十里用東南風一日而到內可小灣泊三處迴避  
六處四程自沙門島開船西南遠望三山島約二百  
餘里用東風半日而到內可小灣泊二處迴避四處  
五程自三山島開船過芙蓉島直西投大西河口約  
四百餘里用東風與東北風一日而到內可小灣泊  
二處迴避三處六程自大清河開船投大溝河約一  
百六十里用西南風一日而到內可灣泊三處迴避

一處七程自大溝河開船投大沽河約二百餘里望見直沽俱無迴避此運船與倭船所同謂大船灣泊避風也若倭得志朝鮮用小漁船號船偷風破浪而來則旅順口一朝夕絕流抵登遡游三夕而抵天津矣然眉之急又可忽乎

膠萊河與海運相表裏若從淮口起運至麻灣而逕度海倉口則免開洋轉登萊一千五六百里其閒田橫島青島黃島元真島竹島宮家島青雞島劉公島之眾島八角島長山島沙門島三山島此皆礁石如戟

白浪滔天其餘小島尙不可數計於此得避豈不爲佳奈膠萊淺澀開鑿之難蓋自元至元阿合馬集議以來傭費不貲十載而罷及今亦屢舉屢廢或謂下有礮砂數十里斧鑿不入或謂鑿時可入鑿後旋漲或又謂開鑿原不難第當事者築室道傍余觀唐宋漕政皆代經六七更水陸不常舟車相禪若可以此例舉則南北用舟於中以車輛接之亦可存其說以備臨渴之一策也余觀黑龍江巖石廉利陡峻尋丈漢張湯尙欲於此通漕於渭其與膠萊又何啻十倍

山東備倭府立於登州癸巳甲午閒倭方得志朝鮮東人設備往往於是余謂客曰此非山東之所謂備倭也曰祖宗不建府於登乎曰登州備倭之設祖宗蓋爲京師非爲山東也海上艤艦大艦乘風而來僅可抵登郡東面而止過此而入則海套之元大艦無順風直達欲泊而待風則岸淺多礁石難繫纜故論京師則登州乃大門而天津二門也安得不於登備之曰然則山東備何地乎曰以山東籌之則登乃山東東北一隅猶人家之有後水門也尙有前堂在倭從

釜山對馬島乘東風而來正對淮口然淮有督儲部府尙宿重兵在倭不遽登岸也其登必從安東日照此數百里無兵然中國之殷瘠彝險倭必有嚮道預知之而泰山香稅外國所豔聞也則必馳泰安州旣則濟甯商店咸在城外倭必覬之而走濟甯又進則臨清大賈所必覬也而馳臨清掠劫旣飽然後入省城此山東大廳堂而倭所必由之道也不備前門而備後門乎曰然則當何備之曰總府立登州旣祖法不可改當從倭汎議以關中防秋例處之登州至安

東惟膠州爲中南北救援咸相去五六百里今遇汛時當調登州總戎駐膠州以南援安東日照安邱諸城一帶而北仍不失救援隨遣隨發而調臨清參戎於登州坐鎮之如總督出花馬池巡撫出固原例汛畢仍歸本鎮是於備京師山東經權兩不失也曰臨清不有糧艘巨萬當護乎曰此非倭所欲也據臨清以絕糧道邱文莊以爲中原不逞者言倭隔海止利在掠金耳曰何以知倭不入登萊也曰登海淺水行二十里皆淖途前所云多礁船不得泊卽起岸而登

州地曠人稀鮮富室若清野待之一望蕭索四五日必回舟而大舟必漂去又無漁船客船可拏用之故倭不走登州也曰登遂可無備乎曰不在今日也倘倭得朝鮮則登與旅順口相對一岸不用乘風不須巨艦只舢艫舴艋一夜而渡抵岸方知此時難防又特甚焉則非今日之比故備寇者須知我險須知彼情難刻舟以求劍也後入與鄭中丞言之設安東備倭



山東考古錄上

清 崑山顧炎武 著

華不注解

華不注伏琛三齊記云不音跗讀如詩鄂不韡韡之不謂華蒂也言此山孤秀如花跗之注於水也按詩箋云承華者鄂不當作跗鄂足也疏云鄂下有韡韡下有跗也古音不跗同左傳成公十六年有韡韡之跗注註云韡韡戎服若袴而屬于跗與袴通疏云自腰以下而注于脚當是古人有此語耳

辨靡笄

齊乘華不注亦名靡笄山非也左傳云從齊師于莘云六月壬申師至于靡笄之下云癸酉師陳于鞏曰逐之三周華不注曰丑父使公下如華泉取飲其文自有次第鞏在華不注之西而靡笄又在其西可知金史長清有靡笄山

考古地里

戰于鞏與三周華不注同是一日計不甚遠而穀梁傳曰鞏去國五百里者據公羊傳注古六尺為步三百步

為里今以三百六十步為里而尺又大于古四之一今之六十二里遂當古之百里今歷城至臨淄正符此數孟子千里而見玉以今計之自鄒至齊亦不過六百里也後漢書耿弇與張步戰于臨淄東城下追至鉅昧水上八九里僵尸相屬今臨淄至鉅昧水亦止六十里耳

考五帝

華不注山下有廟內安五帝像及主而書其主曰青帝句芒氏赤帝祝融氏白帝蓐收氏黑帝元冥氏其中獨

學海類編 二 遊覽  
無黃帝不知何人所爲歷城志云舊爲華陽宮嘉靖十一年巡撫袁宗儒改爲崇正祠提學陸鉞記祀逢丑父閔子騫兩廡祀鐵鉉等二十二人黃福等十九人今廢仍爲華陽宮祀四季之神稱爲四季尤不可解按禮記月令春其帝太皞其神句芒夏其帝炎帝其神祝融季夏其帝黃帝其神后土秋其帝少皞其神蓐收冬其帝顓頊其神元冥此五帝與五行之官各自爲神文義甚明家語季康子問於孔子曰舊聞五帝之名而不知其實請問何謂五帝孔子曰邱也聞諸老聃曰天有五行

水火金木土分時化育以成萬物其神謂之五帝古之王者易代而改號取法五行五行更王終始相生亦象其義故其生爲明王者死而配五行是以太皞配木炎帝配火黃帝配土少皞配金顓頊配水康子曰太皞其始於木何如孔子曰五行用事先起于木木東方萬物之初皆出焉是故王者則之而首以木德王天下其次則以所生之行轉相承也康子曰吾聞句芒爲木正祝融爲火正蓐收爲金正元冥爲水正后土爲土正此五行之主而不亂稱曰帝者何也孔子曰凡五正者五行

之官名五行佐成上帝而稱五帝太皞之屬配焉亦云  
帝從其號昔少皞氏之子有四叔曰重曰該曰修曰熙  
實能金木及水使重爲句芒該爲蓐收修及熙爲元冥  
顓頊之子曰黎爲祝融共工氏之子曰句龍爲后土此  
五者各以其所能業爲官職生爲上公死爲貴神別稱  
五祀不得同帝今乃合之爲一豈非并月令家語而未  
之見者乎

考歷山下大澗

昔之守濟南者以澗爲固元史史樞傳李璫叛據濟南

樞從父天澤往討之城西南有大澗亘歷山樞一軍獨  
當其險夾澗而陣董搏霄傳賊眾自南山來攻濟南望  
之兩山皆赤搏霄按兵城中先以數十騎挑之賊悉來  
鬪騎兵少卻至澗上伏兵起遂合戰城中兵大出大破  
之今其遺跡不復可考志書亦不載此二事

考靈巖寺

靈巖在宋時爲山東名利士大夫來者往往與寺僧酬  
和迨今幾五百年屢經兵火而石刻之存者尙有數十  
可以想見當時之盛自金之末年遂爲屯兵之地金史

學海類編 四 遊覽  
侯摯傳摯行省事於東平權本路兵馬都總管請駐兵于長清之靈巖寺有屋三百餘間且連接泰安之天勝寨萬一兵來足相應援元史嚴實傳泰安張汝楫據靈巖遣別將攻長清實破走之此皆一方大事而志不之及卽石刻僅錄十之一而近年之亂多爲人取用不存良可惜也

古時帝王巡狩東嶽大抵自兗州而東惟唐高宗自齊州而南舊唐書本紀麟德二年十二月丙辰發靈巖頓至泰山下

### 考鐵

漢時濟南爲產鐵之地後漢志言東平陵有鐵歷城有鐵又韓稜傳肅宗賜陳寵寶劍曰濟南椎成注椎直追反漢官作鍛成是不惟產鐵又出名劍今府學之鐵牛靈巖寺之鐵袈裟皆鐵之精英發見於地上者也

### 考竹

北方古稱多竹之地有三淇渭汶史記河渠書下淇園之竹以爲楛後漢書寇恂傳伐淇園之竹爲矢百餘萬此衛竹也史記貨殖傳渭川千畝竹漢書有司竹監此

秦竹也樂毅報燕惠王書薊邱之植植于汶篁潘岳笙  
賦鄒魯之珍有汶陽之孤篠焉而古詩亦云冉冉孤生  
竹託根泰山阿此魯竹也又左傳齊人弑懿公納諸竹  
中而晉師焚申池之竹木則齊都之旁亦有竹矣今語  
北人種竹輒云土性不宜何也

又辨魯地爲古徐州

晉書天文志所載分野全不足信其云角亢氏鄭兖州  
又云泰山入角十二度濟北入亢五度按泰山在春秋  
時爲魯境上濟北郡治盧在春秋時爲齊邑史記泰山

之陽則魯其陰則齊唐書天文志岱嶽眾山之陰爲女  
虛危岱嶽眾山之陽爲奎婁其說甚當禹貢徐州之北  
青州之西南皆距岱泰山郡乃古徐州之地古之兖州  
在濟河之間晉志不辨而以今之兖州爲古之兖州遂  
以應角亢之分以合於史記天官書之記洪氏譏其不  
知地理信矣

辨無字碑爲漢立

嶽頂無字碑世傳爲秦始皇立按秦碑在玉女池上李  
斯篆書高不過四五尺而銘文并二世詔書咸具不當

又立此大碑也考之宋以前亦無此說因取史記反復  
讀之知爲漢武帝所立也史記秦始皇本紀云上泰山  
立石封祠祀其下云刻所立石是秦石有文字之證今  
李斯碑是也封禪書云東上泰山泰山之草木葉未生  
乃令人上石立之泰山巔上遂東巡海上四月還至奉  
高上泰山封而不言刻石是漢石無文字之證今碑是  
也後漢書祭祀志亦云上東上泰山乃召上石立之泰  
山巔然則此無字碑明爲漢武帝所立而後之不讀史  
者誤以爲秦耳

始皇刻石之處凡六史記書之甚明于鄒嶧山則上云  
立石下云刻所立石于之罘則二十八年云立石二十  
九年云刻石于琅邪則云立石刻頌秦德于會稽則云  
立石刻頌秦德無不先言立後言刻者惟于碣石則云  
刻石碣門門自是石不須立也古人作史文字之密如  
此使秦皇別立此石秦史焉得不紀使漢武有文刻石  
漢史又安得不錄乎

### 辨高里山

泰安州西南二里俗名蒿里山者高里山之訛也史記

封禪書十二月甲午朔上親禪高里漢書武帝紀太初元年十二月禪高里注伏儼曰山名在泰山下乃若蒿里之名見于古挽歌不言其地

漢書武五子傳蒿里傳兮郭門闕注師古曰蒿里死人里審若此山爲死人之里武帝何所取而禪祭之乎自晉陸機泰山吟始以梁父蒿里竝列而後之言鬼者因之遂令古昔帝王降禪之壇一變而爲閻王鬼伯之祠矣

漢書上親禪高里師古注曰此高字自作高下之高而

原鬼

死人之里謂之蒿里其字爲蓬蒿之蒿或者誤以高里爲蒿里混同一事陸士衡尙不免况餘人乎

予嘗考泰山之故仙論起於周末鬼論起于漢末左氏國語未有封禪之文是知三代以上無仙論也史記漢書未有考鬼之說是知元成以上無鬼論也遁甲開山圖曰泰山在左亢父在右亢父知生梁父主死博物志曰泰山一曰天孫言爲天帝之孫主召人魂魄知生命之長短此二者皆其說之所本其初見於史者則漢書

方術傳許峻自云嘗篤病三年不愈乃謁泰山請命烏桓傳死者神靈歸赤山赤山在遼東西北數千里如中國人死者魂神歸泰山也三國志管輅傳謂其弟辰曰但恐至泰山治鬼不得治生人如何而劉楨贈五官中郎將詩有曰常恐游岱宗不復見故人然則鬼論之興其在東漢之世乎

或曰地獄之說本于宋玉招魂之篇長人土伯則夜叉羅刹之論也爛土雷淵則刀山劍樹之地也雖文人之寓言而意已近之矣於是漢魏以下之人遂演其說而

附之釋氏之書昔宋儒胡寅謂閻立本寫地獄變相而周興來俊臣得之以濟其酷又孰知宋玉之文實爲之祖孔子謂爲俑者不仁有以也夫

### 辨漆河

獄之西南有水出谷中爲西溪自大峪口至州城之西而南流入於泮曰漆河其水在高里山之左有橋跨之曰漆河橋世傳人死魂不得過而曰奈河此如漢高帝云柏人者迫於人也

### 考社首

史記周成王封泰山禪社首唐書高宗乾封元年正月  
庚午禪社首元宗開元十三年十一月辛卯禪社首宋  
史真宗大中祥符元年十月壬子禪社首今高里山之  
左有小山其高可四五丈志云卽社首山在嶽旁諸山  
中最卑小不知古人何取于此意者封於高欲其近天  
禪于下欲其近地且山卑而附嶽址便于將事初涉高  
山之後不欲更勞民力耶

考碧霞元君

世人多以碧霞元君爲泰山之女後之文人知其說之

不經而曲引黃帝遣玉女之事以附會之不知當日所  
以褻封固真以爲泰山之女也今考封號雖自宋時而  
泰山女之說西晉以前已有之張華博物志文王以太  
公望爲灌壇今朞年風下鳴條文王夢見有一婦人甚  
麗當道而哭問其故婦人言曰我東海泰山神女嫁爲  
西南婦欲東歸灌壇令當吾道太公有德吾不敢以暴  
風疾雨過也文王夢覺明日召太公三日三夕果有疾  
風驟雨去者皆西來也文王乃拜太公爲大司馬此一  
事也干寶搜神記後漢胡母班嘗至太山之側爲泰山

府君所召令致書于女婿河伯云至河中流扣舟呼青  
衣當自有取書者果得達復爲河伯致書府君此二事  
也列異傳記蔡文事又以天帝爲泰山神之外孫自漢  
以來不明乎天神地祇人鬼之別一以人道事之於是  
封嶽神爲王則立寢殿爲王夫人有夫人則有女而女  
有婿又有外甥矣唐宋之時但言靈應卽加封號不如  
今之君子必求其人以實之也  
又考泰山不惟有女亦又有兒魏書段承根傳云父暉  
師事歐陽湯有一童子與暉同志後二年童子辭歸從

暉請馬暉戲作木馬與之童子甚悅謝暉曰吾泰山府  
君子奉勅游學今將歸損子厚贈無以報德子後至常  
伯封侯非報也且爲好言訖乘馬騰虛而去集異記言  
貞元初李納病篤遣押衙王祐禱于岱岳遙見山上有  
四五人衣碧汗衫半臂路人止祐下車言此三郎子七  
郎子也山東通志後唐長興三年詔以泰山三郎爲威  
權將軍宋眞宗加封炳靈公夫封其子爲將軍爲公則  
封其女爲君正一時之事爾 又考元劉遵魯漁島記  
曰廟中神妃相傳爲東海廣德王第七女夫海有女則

山亦必有女也

考人祖

秦山上有人祖殿不知何取三秦記曰驪山顛有人祖廟不齋戒而往卽風雨迷道長安志曰卽秦始皇祠蓋本之史記所云祖龍者人之先也今臨潼志以始皇不應祀典改爲三皇廟按史記封禪書南山巫祠南山秦中者二世皇帝夫二世尙祀奚必始皇之不祀乎

錄唐勅

泰山之東南麓王母池西有唐岱嶽觀今存茅屋三楹

士人稱爲老君堂其前有碑二高八尺許上施石蓋合而束之俗呼爲鴛鴦碑其字每面作四五層每層文一首或二首皆唐時建醮造像之記而下層爲積土所壅就其上周環讀之得顯慶六年一首儀鳳三年一首天授二年一首萬歲通天二年一首聖歷元年一首久視二年一首長安元年一首四年二首神龍元年一首景龍元年一首三年一首景雲二年二首開元八年一首大歷七年一首建中元年一首其空處又有唐代人題名書法不一東側面有詩一首其下題名西側面題名

亦有詩一首中二側皆無字唐碑自磨厓之外存者唯此以小而雙束故不仆書非名筆故摹拓者少而獨完至今因歎唐時六帝一后修齋建醮凡二十計共此二碑亦異乎近代之每歲一碑以勞人而災石者矣但不知趙明誠金石錄何以不收恐古人碑記失傳者正多耳其勅一首詩一首文辭斐然因錄於後

碑字凡大周年者天作而地作塋人作至聖作璽年作率月作㊦亦作㊧日作㊨投作稔初作廛唯厓字無可考疑是應字凡數字作壹貳叁肆伍陸柒捌玖拾等字

皆武后所改及自制字其璽歷碑有云設金籙寶齋河圖大醮黍㊩黍古七字太元經規擬之二黍是也後人不知妄于左旁添鑿三點淺而大又稍偏知非一筆

勅

景雲二年六月二十三日皇帝敬憑太清觀道士楊大希於名山斫燒供養惟靈蘊祕凝真含幽綜妙類高閔之亭育同厚載之陶鈞蓄洩烟雲蔽虧日月五芝標秀八桂流芳翠嶺萬尋青溪千刃當作蜺裳戾止恒爲碧落之廷鶴駕來遊卽是玉京之域百祥覃

于遠邇五福被于黎元往帝所以馳心前王由其載  
想朕恭膺寶位嗣守昌圖恐百姓之不甯慮八方之  
未泰式陳香薦用表深衷實冀明靈降茲休祉所願  
從今以後浹寓常安朕躬男女六姻永保如山之壽  
國朝官寮萬姓同符擊壤之歡魚鳥遂性之飛沈夷  
狄歸心于邊徼實希靈鑑用副翹誠今因鍊帥遣此  
不悉

詩

早春陪勅使麻先生祭

岳守博城縣令馬

我皇盛文物道化天地先鞭撻走鬼神玉帛禮山川  
忽下元洲使來遊紫洞前青羊得處所白鶴時年  
虔懇飛龍記昭彰化鳥篇□風半山水□氣總雲烟  
光抱昇中日霞明五色天山橫翠微外室在綠潭邊  
緹幕灰初應焚林火欲然年光著草樹春色換山泉  
伊水來何日嵩年去幾千山疑小天下人是會神仙  
葉令乘鳧入浮邱駕鶴旋麻姑幾年歲三見海成田

按久視二年記云神都青元觀主麻慈力即其人也  
武后遣之至觀修醮神都即東都故有伊水嵩巖之  
句字半刊落其  
不可知者闕之

錄宋牒

泰山東南麓升元觀有宋牒碑其大字草書甚遒勁不知何人筆錄之以見當日牒文之式考宋史婁寅亮傳但云政和二年進士為上虞丞不言歷官兗州亦可以此碑補史之闕其曰太師魯國公則蔡京也

尚書省牒準泰甯軍奉符縣升元觀

右第一行

泰甯軍狀據兗州儀曹掾兼兵曹婁寅亮狀稱契勘兗州奉符縣泰山之下有古洞天周三十里名曰三宮空洞之天載在圖經是實即目宮觀并無名額卻

有建封院一所逼連嶽廟之後殿屋完備田產頗多只一村僧占據住持任從民間安攢邱墓穢惡不蠲深慮觸瀆真仙不便欲乞備申朝廷改為道觀州司看詳本院委合改充前件洞天道觀伏候指揮右小字牒奉勅宜賜升元觀為額牒至準勅故牒右大字草書起復太中大夫守左丞王 押  
起復少宰 押

太師魯國公

不押

右字略小真書

政和八年六月十四日牒

右末一行

政和八年閏九月二十一日襲慶府管內都道正兼  
推措置知升元觀事洞元太師賜紫道士李冲寂邱  
石 右左方之下

普照寺有金大定五年牒碑長春觀有元丁亥年牒  
碑其式略同金元碑並有印曰尙書禮部之印卽今  
篆文不用女直蒙古字

### 錄元聖旨

元史泰定帝本紀有卽位一詔文極鄙俚蓋以曉其本  
國之人者今嶽廟有二碑其文亦然可發一笑然其曰  
每年燒香的上頭得來的香錢物件只教先生每收掌  
者則是時香錢固未嘗以入官也後世言利之臣蓋元  
之不如也已

長生天氣力裏大福廕護助裏皇帝聖旨軍官每根  
底軍人每根底管城子達魯花赤官人每根底來往  
的使臣每根底宣諭的聖旨成吉思皇帝月古台皇  
帝薛禪皇帝完澤篤皇帝曲律皇帝普顏都皇帝格  
堅皇帝聖旨裏和尚也里可溫先生達識蠻每不揀

甚麼差發休當者告天祝壽者麼道有來如今依著  
在昔聖旨體例裏不揀甚麼差發休著者與咱每告  
天祈福者麼道泰安州有的泰山東嶽廟住持提點  
通義守正淵靖大師張德璘先生每根底執把行的  
聖旨與了也這的每廟宇房院裏使臣休安下者鋪  
馬祇應休挈者商稅地稅休與者但屬他們的水土  
園林展磨鋪席不揀甚麼他每的休倚氣力奪要者  
每年燒香的上頭得來的香錢物件只教先生每收  
掌者廟宇損壞了呵修理整治者這的每其閒裏不

揀是誰休入來休沮壞者更這張德璘梁道根底聖  
旨與了也無體例勾當行呵他不怕甚麼 聖旨泰  
定年鼠兒年十月二十三日大都有時分寫來  
至正四年猴兒年聖旨碑略同

錄白龍池題名

嶽西傲耒峰下有白龍池懸崖絕壑殆非人境石壁平  
廣二十餘丈書曰龍池曰白龍池竝大字其旁皆宋人  
題名尙未刊缺因書之得十五首其文略無重複自治  
平迄宣和六十年閒人名字亦可以想見當日太平之

盛而金元以降洊遭兵火名山奧區委之榛莽無復有題名者矣

內供奉官李舜舉被命禱祀帝岳奉香勝槩於壽聖節日先款青帝宮次詢白龍潭治平四年題

下云書吏李恭

從行蓋此字即恭之筆

兗州劉袞奉詔祈雪于岱宗絕頂翌日謁白龍池之

祠元祐丁卯孟春初四日奉符令林會題

大字

貫道建欄於此以便遊者元祐丁卯正月八日

大字

范陽正輔再遊同魯國景元祐丁丑三月二十六日

元符庚辰七月晦趙習之徐安國弟居仁孫正仲同

遊

大字

皇甫侖徐端朝孫節同遊建中靖國元年三月二十

六日題

奉符令李珪因捕蝗恭謁白龍祠男彙侍行崇甯壬午孟春初七日

誠中君寶德升崇甯二年八月二十六日自王母池

來訪此

董元康政和甲午重九日攜家來遊質贄賁侍行

自恭觀元康兄留字政和乙未孟冬二十日

莆陽陳國瑞子玉恭謁白龍池祠俯洞酌泉小憩而

邁政和丁酉夏前二日 大字

姜子正子方李晉道劉言可刁文叔同來庚子四月

李顯道張公美王仲與張去塵庚子孟夏十九日同

遊池上

鄆城李僨弟俊姪贛隨侍遊此癸卯季春二十八日

張子觀水于池十三年春三月

篆書大字無年號按宋朝紀年無有至十三年者若曰金元又不合一代至無題名止此一人也以後但有成化壬寅知州賈宣萬歷七年知

州袁槍謁白龍池二刻

### 辨肅然山

史記武帝禪泰山下址東北肅然山註服虔云肅然山

在梁父按梁父縣在今兗州府泗水縣境是泰山之南

與本文東北不合西陽雜俎云長白山古肅然也亦非

按史記帝以乙卯封泰山明日下陰道丙辰禪泰山下

趾東北肅然山明日即丙辰也本日下山本日行禮必

在三五十里之內不當遠至長白山也魏書崔光傳弟

敬友嘗置逆旅于肅然山南大路之北設食以供行者

今泰安州東關往北七十里地名王許保其北有山碑  
云古宿巖山恐卽肅然山也又按光武以二月二十二  
日辛卯封泰山夜下山明日百官上壽暮宿奉高三十  
里明日發至梁父九十里二十五日甲午禪梁父則謂  
肅然在梁父者亦非

山東考古錄下

考泰山都尉

清 崑山顧炎武 著

後漢書桓帝紀永興二年泰山琅邪賊公孫舉等反殺  
長史永壽元年七月初置泰山琅邪都尉官延壽五年  
八月己卯罷琅邪都尉官八年五月壬申罷泰山都尉  
官金石錄載漢泰山都尉孔宙碑云宙以延熹四年卒  
蓋卒後四年官遂廢矣然泰山都尉實不始于此光武  
時曾置之文苑傳夏恭光武時拜郎中再遷泰山都尉

又光武紀建武六年初罷郡國都尉官恭之遷蓋在此年前也

### 考泰山兵

泰山自公孫舉東郭寶勞丙叔孫無忌相繼叛亂以是置都尉之官以後官雖不設而郡兵領于太守其力素厚故何進使府掾泰山王匡東發其郡強弩而應邵夏侯淵亦以之破黃巾可見前代裁官不裁兵之効

### 辨闕里

闕里志引漢晉春秋曰魯有二石闕曰闕里又以爲後

儒尊崇夫子之稱其說自相牴牾按史記魯世家煬公築茅闕門春秋定公二年夏五月壬辰雉門及兩觀闕冬十月新作雉門及兩觀註雉門公宮之南門兩觀闕也孔子宅至漢魯恭王時尙存漢晉春秋之云二石闕必有所據石闕之下其里卽名闕里而夫子之宅在焉遂以爲名魯論有闕黨童子五百家爲黨闕黨是闕下之黨左傳鄭伯享王于闕西辟是闕之西偏漢書儒林傳有鄒人闕門慶忌註云姓闕門名慶忌蓋亦如東門北宮之類以居爲氏者也後漢書獻帝紀下邳闕黨宣

註闕黨童子之後

### 考武城

史記仲尼弟子列傳曾參南武城人澹臺滅明武城人後人遂疑魯有兩武城而謂子羽爲今費縣之武城曾子則別一武城在今之嘉祥縣其說全無所本今考武城之見於春秋者襄公十九年城武城註云泰山南武城縣昭公二十三年邾人城翼還將自離姑公孫鉏曰魯將御我欲自武城還循山而南徐鉏兵弱茅地曰道下遇雨將不出是不歸也遂自離姑武城人塞其前斷

其後之木而弗殊邾師過之乃推而蹶之遂取邾師獲鉏弱弟哀公八年吳伐我子洩率故道險從武城初武城人或有因子吳境田焉拘郟人之漚管者曰何故使吾水滋及吳師至拘者道之以伐武城克之王犯嘗爲之宰澹臺子羽之父好焉國人懼吳師克東陽而進舍于五梧十一年齊伐我及清冉有以武城人三百爲己宰徒孟子亦云曾子居武城有越寇夫與邾郟爲鄰而當吳越之路邑山險而人勇悍此今費縣之武城也且澹臺子羽之武城卽南武城安得又有一武城更在其

南而爲曾子之所居乎史記正義曰地理志定襄有武城清河有武城故此有南武城此說近是又如平原君傳云封于東武城亦其例也齊乘古武城費西滕東兩縣之閒子游弦歌舊邑歷考古書魯無兩武城故知其卽一地矣 史記兩弟子皆武城人獨於曾子加一南字而漢書泰山郡無南武城止有南成縣屬東海郡後漢書作南城屬泰山郡至晉始爲南武城以此生後人之疑然後漢志云南城有東陽城引左傳哀公八年吳師克東陽是爲今費之武城甚明或曰嘉祥之南武山

有曾子墓成化中有漁者陷入其穴得石碣而封志之夫曹縣之冉堦爲秦相穰侯魏冉之冢而今人以爲仲弓如此之類蓋難以盡信也 又按史記田敬仲完世家威王曰吾臣有檀子者使守南城則楚人不敢爲寇東取泗上十二諸侯皆來朝此卽泰山之南城也

### 考薛爲徐州

史記齊世家田常執簡公於徐州田敬仲完世家宣王九年與魏襄王會徐州諸侯相王也十年楚圍我徐州魏世家襄王元年與諸侯會徐州楚世家威王七年齊

孟嘗君父田嬰欺楚楚伐齊敗之於徐州越世家句踐已平吳乃以兵北渡淮與齊晉諸侯會于徐州魯世家頃公十九年楚伐我取徐州按後漢書志薛本國六國時曰徐州在今滕縣之南薛河北有大城田文所築也此與楚魏二國爲境而威王曰吾吏有黔夫者使守徐州則燕人祭北門趙人祭西門徙而從者七十餘家蓋與梁惠王言不欲斥魏更以燕趙夸之耳索隱曰說文邾邾之下邑在魯東又紀年云梁惠王三十一年下邳遷于薛故名曰徐州則徐與邾並音舒也

今讀爲禹貢徐州之徐者誤齊世家田常執簡公于徐州春秋正作舒州

### 考楚境及齊長城

史記楚世家惠王四十四年滅杞杞國在淳于然則今之安邱屬楚矣簡王元年北伐滅莒然則今之莒州屬楚矣威王伐越殺王無疆取其地而越之國都別在琅邪然則今之諸城屬楚矣惠王時越滅吳楚東侵廣地泗上頃襄王十五年取齊淮北而故宋之地盡入于楚然則今之滕屬楚矣考烈王八年取魯魯君封于莒十四年滅魯頃公遷卞邑爲家人然則今之曲阜泗水屬

楚矣大約齊之邊境青州以南則守在大峴濟南以南則守在泰山是以宣王築長城緣河往泰山千餘里至琅邪臺入海而楚人之對頃襄王亦曰朝射東莒夕發涓邱夜加卽墨

顧據午道則長城之東收而泰山之北舉矣亦可以見當時形勢之大略也

### 考費惠公

孟子費惠公註惠公費邑之君按春秋時有兩費其一見左傳成公十三年晉侯使呂相絕秦曰殄滅我費滑註滑國都於費今緱氏縣襄公十八年楚蔣子馮公子格率銳師侵費滑蓋本一地秦滅之而後屬鄭耳其一

僖公元年公賜季友汶陽之田及費齊乘費城在費縣西北二十里古之伯國姬姓懿公之孫後為季氏邑在子思時滑國之費其亡已久若季氏不得稱公又楚人對頃襄王有鄒費郟邲意者亦如孟嘗君之稱薛公耶

### 考洸河

商輅岡城闡記最為明悉其言汶泗二水分流南北不相通元至元二十六年始于衮北築岡城垣障汶水南流由洸河注濟甯今考晉書荀羨傳慕容蘭以數萬眾屯汴城甚為邊害羨自洸水引汶通渠至于東阿以征

之臨陣斬蘭是洗河在晉已嘗爲運道矣

### 辨章邱

三齊記曰章亥有三女溺死葬此考淮南子太章豎亥是兩人今云三女章女乎亥女乎蓋因縣北山名女郎而附會其說今按爾雅釋邱曰上正章邱註曰頂平然則章邱之名已見于古經傳矣

### 考管縣

漢書濟南郡有管縣註應邵曰音姦後漢書管有賴亭唐書武德二年於平陵縣置譚州并置平陵縣以章邱

亭山管城臨邑隸之八年省管城入平陵齊乘按述征記歷城到管城三十里自城以東水瀰漫數十里閒南則迫山實爲險固逮金亂土人因阻水立邑號曰水塞山東通志亦作管城而唐書誤刻管字作營齊乘遂附會之曰漢宣帝封趙充國爲營平侯按恩澤侯表營平侯食邑於濟南今無可考且營平連二字爲名亦無稱爲營城之理也 又按王子侯表營平侯信都齊悼惠王子孝文四年封是營平必在濟南境內但非此之營城耳

今章邱縣西北七十里大清河之濱有土城或以爲卽古之管城山東通志謂管城在臨濟城北則此是矣然其距歷城乃八十里與述征不合

### 考齊地用舟師

隋書張須陁傳孫宣雅等眾十餘萬攻章邱須陁遣舟師斷其津濟親率馬步二萬襲擊大破之賊徒散走旣至津梁復爲舟師所拒前後狼狽獲其家累輜重不可勝計是齊地古嘗用舟師也

### 辨濟南郡無鄒縣

漢書濟南郡之縣十四一曰東平陵二曰鄒平三曰臺四曰梁鄒功臣表則有臺定侯戴野梁鄒孝侯武虎是二縣竝爲侯國後漢書濟南郡十城其一曰東平陵其四曰臺其七曰梁鄒其八曰鄒平陵而安帝紀云元光三年二月戊子濟南上言鳳凰集臺縣丞霍收舍樹上章懷太子註云臺縣屬濟南郡故城在今齊州平陵縣北水經註亦云濟水又東北過臺縣北尋其上下文句本自了然後人讀漢書誤從鄒字絕句因以鄒爲一縣平臺爲一縣齊乘遂謂漢濟南郡有鄒縣後漢改爲鄒

平此不得其句讀而妄爲之說也

漢以鄒名縣者五魯國有騶亦作鄒膠東國有鄒盧干乘郡有東鄒與濟南之鄒平梁鄒凡五其單稱鄒者今兗州府之鄒縣也亦有平臺屬常山郡外戚恩澤侯表平臺康侯史元後漢書邳彤傳尹綏封平臺侯是也有鄒平有臺而亦有鄒有平臺不可不辨也晉時縣名多沿漢舊按史何曾傳曾孫機爲鄒平令是有鄒平矣解系傳父修封梁鄒侯劉頌傳追封梁鄒縣侯是有梁鄒矣宋書言晉太康六年三月戊辰樂安梁鄒等八縣隕

霜傷桑麥文帝紀元嘉二十八年五月乙酉亡命司馬順則自號齊王據梁鄒城八月癸亥梁鄒平斬司馬順則是宋有梁鄒矣不知何故晉書地理志于樂安國下單書一鄒字此史之闕文而齊乘乃云晉省梁鄒入鄒縣夫晉以前此地本無鄒縣而何從入之乎蓋不知而妄作者矣

### 考臺縣

齊乘云臺城在濟南東北十三里漢封戴野爲臺侯而復云又有平臺城在臺城北五十餘里漢縣俗曰故軍

學海類編 卷之九 遊覽  
城則誤矣按章懷太子註臺在平陵之北則齊乘所云  
平臺城卽臺城耳云在濟南東北十三里者非也

### 辨景相公墓

鄒平縣南五里有景相公墓通鑑五代周顯德元年七  
月癸巳以樞密院直學士工部侍郎長山景範爲中書  
侍郎同平章事此地唐時屬常山也景氏之裔自洪武  
年閒有兩舉人今亦尙有諸生不能記其祖矣不知何  
年謬傳爲晉之景延廣而邑志載之以後山東通志等  
書襲舛承訛無不以爲延廣墓後有令于此者謂延廣

于晉爲誤國之臣遂至咎其後人而毀其祠昔年邑之  
士大夫頗有能知五代閒事以爲非是予至其邑有諸  
生二人來稱景氏之孫請問其祖因取通鑑及五代史  
世宗紀示之又示以景延廣傳曰延廣字航川陝州人  
也乃謝而去及寫碑文以來其文爲翰林學士朝議郎  
尙書水部員外郎知制誥柱國扈載撰雖剝落者五之  
一其曰故中書侍郎平章事景公諱範字甚明白且生  
封上柱國晉陽縣開國伯歿贈侍中其文有曰我大周  
聖神恭肅文帝孝皇帝建大功于漢爲北藩於魏郡又

曰今皇帝嗣位登用舊臣又曰冬十一月薨於蓄川郡之私第其末曰顯德三年歲次丙辰十二月己未朔越十日戊申因嘆近日士人之不學以本邑之人書本邑之事而猶不可信以明白易見之碑而不之視以子孫而不識其先人推之天下郡邑之志如此者多矣又按通鑑顯德二年八月丁未中書侍郎同平章事景範罷判三司尋以父憂罷政事今碑文有云以列卿歸第懸車故鄉嗟風樹之忽警訴昊天兮何極則是罷官歸里而後遭父喪與史不同識以備考

王元美作李于鱗友人龔克懋妻景氏墓誌銘亦以爲延廣之後雖本其家之行狀然王李二先生亦未嘗究心于史學也

### 考漢都尉治於陵

漢濟南郡太守治東平陵而都尉治於陵者以長白山也魏書辛子馥傳長白山連接三齊瑕邱數州之界多有盜賊子馥受使檢覆因辨山谷要害宜立鎮戍之所又諸州豪右在山鼓鑄姦多依之又得密造兵仗亦請破罷諸冶朝廷善而從之隋大業九年齊人孟讓王薄

等眾十餘萬據長白山攻剽諸郡以張須陁王世充之力不能滅訖于隋亡觀此二事則知漢人立都尉治於陵之意杜氏通典長山下云漢濟南郡故城今在縣西北齊乘等書皆仍之按二漢濟南郡並治東平陵距長山百餘里不應此地仍有濟南郡城豈以都尉治此而名耶又漢書地理志般陽莽曰濟南亭而後漢書章帝紀元和二年進幸濟南註云縣名今淄川及考郡國志又無此縣不知章懷太子何所據而云也

辨淄川非薛

漢書魯國有薛縣史記公孫宏傳齊菑川國薛縣人也言齊又言菑川而薛並不屬二國殊不可曉正義曰表云菑川國文帝分齊置都劇括地志云故劇城在青州壽光縣南三十一里故薛城在徐州滕縣界地理志薛縣屬魯國按薛劇隔兗州及泰山未詳今考儒林傳言薛人公孫宏是宏審爲薛人上言齊菑川者誤耳人疑孟嘗君之封在菑川太史公曰吾嘗過薛其俗閭里率多暴桀子弟與鄒魯殊若在菑川其壤地與齊相接何不言齊而言鄒魯乎又按後漢書志云薛本國註引地

道記曰夏車正奚仲所封冢在城南二十里山上皇覽曰靖郭君冢在城中東南陬孟嘗君冢在城中向門東北邊益可信孟嘗君之封不在菑川也

又按地里志菑川國三縣劇東安平樓鄉劇在今壽光縣西南東安平在今臨淄縣東南一十里樓鄉未詳所在今之淄川不但非薛并非漢之菑川乃般陽縣耳以爲漢之菑川而又以爲孟嘗君之薛此誤而又誤也

### 考夾谷

春秋定公十年夏公會齊侯于夾谷傳曰公會齊侯于

祝其實夾谷杜預注及服虔註史記皆云在東海祝其縣劉昭志亦云祝其有羽山春秋時曰祝其夾谷地通典東海懷仁縣有谷山春秋之夾谷也相承遂謂夾谷山在今贛榆縣西五十里愚嘗以爲疑贛榆在春秋爲莒地與齊魯之都相去各五六百里何必若此之遠當時景公之觀不過曰遵海而南放於琅邪而已未聞越他國之境及讀金史云淄川有夾谷山一統志云夾谷山在淄川縣西南三十里舊名祝其山其陽卽齊魯會盟之處萌水發源于此水經注萌水出般陽縣西南甲

山按此則金史之夾谷山卽水經註之甲山而萊蕪縣志則又云夾谷在縣南三十里接新秦界二說皆未知其何所據但在萊蕪縣則正當齊魯之境在淄川則已入齊地一百餘里以情理論之似當近于贛榆昔人皆泥漢時祝其縣之在東海而不知地名或有相同者如此之類卻不可信古註而拂事理也

### 考畫邑

史記田單傳畫邑注劉熙曰齊西南近邑正義曰括地志云戟里城在臨淄西北三十里春秋時棘邑又云畫

邑因畫水爲名也後漢書耿弇傳時張步都劇使其事藍將精兵二萬守西安諸郡太守合萬餘人守臨淄相去四十里弇進軍畫中居兩城之間註西安縣名屬齊郡故郡在今青州臨淄縣西北畫邑故城在西安城東南按西安卽今索鎮在臨淄之西非西北也孟子去齊宿於畫王曰棄寡人而歸是孟子自齊反鄒其道不由西北可知劉熙註是

孟子所宿之畫卽畫邑也

### 考杞梁妻

春秋傳齊侯襲莒杞梁死焉齊侯歸遇杞梁之妻于郊

使弔之辭曰殖之有罪何辱命焉若免于罪猶有先人之敝廬在下妾不得與郊弔齊侯弔諸其室左氏之文不過如此而已檀弓則曰其妻迎其柩於路而哭之哀孟子則曰華周杞梁之妻善哭其夫而變國俗言哭者始自二書說苑則曰杞梁華舟進鬪殺二十七人而死其妻聞之而哭城爲之陔而隅爲之崩列女傳則曰杞梁之妻無子內外皆無五屬之親旣無所歸乃枕其夫之屍於城下而哭道路過者莫不爲之揮涕十日而城爲之崩言崩城者始自二書夫左氏檀弓俱言有先人

之敝廬何至枕屍城下且莊公旣能遣弔豈至暴骨溝中子政之言沒其知禮而憐其盡哀此殆于細人之見也然其崩者城耳未云長城長城築于宣王之時去莊公百有餘年而齊之長城又非秦所築之長城也後人相傳乃謂秦築長城有范郎之妻孟姜送寒衣至城下聞夫死一哭而長城爲之崩則與杞梁之事全不相蒙矣夫范郎者何人哉琴操曰范杞梁妻歎者齊邑范梁殖之妻所作也杞而加之以范蓋自此始而轉爲秦代之人則又不知其傳譌之所自矣余過長清縣之長城

鋪見有杞梁妻祠乃列聖母娘娘諸像不下十數而人  
尙呼之爲姜女廟又杞梁死地當在今之莒州非長清  
也因書此以待後之明君子正焉

### 考牟國

春秋以牟名國與地者有三桓公十五年牟人來朝註  
云牟國今泰山牟縣僖公五年公孫茲如牟娶焉隋書  
羸下云開皇十六年分置牟城縣大業初併入焉按萊  
蕪縣志云牟城在縣東二十里春秋時牟國漢爲泰山  
郡牟縣北魏省入于羸隋開皇十六年分羸置牟城大

業初復併入此其故城也其一則曰牟婁隱公四年莒  
人伐杞取牟婁注云城陽諸縣東北有婁鄉昭公五年  
莒牟夷以牟婁及防茲來奔路史密之諸城有婁鄉是  
也其一則曰根牟宣公九年取根牟註云根牟東夷國  
也隋書安邱下云開皇十六年置曰牟山大業初改名  
路史根牟曹姓子爵魯宣公取之杜預謂琅邪陽都東  
南之牟鄉城樂史云根牟國卽密之安邱隋之牟山縣  
按青州府志安邱縣西南十五里爲牟山隋縣是也舊  
志多未分析故特注之

濰水土人名爲淮河齊乘云漢書地里志濰或作淮故俗亦名淮河諸城志云傳箕屋山舊多產榲水從榲根出故俗呼爲淮河以音之同也竝誤愚按古人省文濰字或作維或作淮總一字也漢書或作淮者從水從鳥佳之佳古文作卽維字而省其中系耳今呼爲淮則竟爲江淮之淮從水從佳人之佳古文作於隸則差之毫釐於古文則失之千里矣如開封之汜水左傳本音凡從水從已而今呼爲濛汜之汜音杞亦以字形之

似而訛也

又如三國志吳作唐邑涂塘以淹北道晉書宣帝紀王凌詐言吳人塞涂水武帝紀琅邪王伉出涂中竝是滁字古滁省作涂與濰作淮正同韻書竝不載此二字

### 考鼻盪舟

論語鼻盪舟何晏解鼻多力能陸地行舟似未必然畢氏引竹書紀年帝相二十七年澆伐斟鄩大戰于濰覆其舟滅之又引楚辭天問覆舟斟鄩何道取之證爲一事最明易傳八卦相盪古人以左右衝殺爲盪陣此字

義也即長助八佳時古人以古水外疑  
其考洋水民益補天門  
通鑑宋明帝泰始三年沈文秀攻青州刺史明僧暲帝遣輔國將軍劉懷珍浮海救之進至黔陬文秀所署長廣太守劉桃根將數千人戍不其城懷珍軍于洋水遣王廣之將百騎襲不其城拔之註云洋水即巨洋水案不其城在今即墨縣西南而巨洋水乃今之巨蔑河在臨朐益都壽光三縣之境與黔陬不其相去三四百里安能以百騎而襲取之乎水經注云拒艾水出黔陬縣

西南拒艾山又謂之洋洋水膠州志曰洋河在州南三十里發源鐵嶽山東流入于海此即懷珍所屯軍處耳

### 考棠邑

春秋以棠名地者有三有魯之棠有萊之棠有楚之棠隱公五年公矢魚於棠註高平方輿縣北有武棠亭魯侯觀魚臺在今魚臺縣北一十二里襄公六年王湫帥師及正輿子棠人軍齊師萊共公浮柔奔棠晏弱圍棠註棠萊邑十六年齊侯駕將走郵棠註郵棠齊邑二十五年齊棠公之妻註棠公齊棠邑大夫後漢書郡國志

學海類編 卷之二十一 遼東 遼東 遼東  
卽墨有棠鄉今在平度州境昭公二十年棠君尙謂其  
弟員註棠君奢之長子尙也爲棠邑大夫後漢書郡國  
志廣陵郡棠邑春秋時曰棠則今之六合縣孟子齊饑  
陳臻曰國人皆以夫子將復爲發棠註棠齊邑此萊之  
棠當時卽墨爲齊之大都倉廩在焉亦從此知之也

### 辨勞山

勞山之名齊乘以爲登之者勞又云一作牢邱長春又  
改爲鼇皆鄙淺可笑按南史明僧紹隱于長廣郡之嶗  
山本草天麻生泰山嶗山諸山則字本作嶗若魏書地

形志唐書姜撫傳竝作牢乃傳寫之誤

寰宇記秦始皇登勞盛山望蓬萊後人因謂此山一名  
勞盛山誤也勞盛二山名勞卽勞山盛卽盛山史記封  
禪書七曰日主祠成山斗入海漢書作盛山古字  
通用齊之東偏環以大海海岸之山莫大乎勞成二山  
故始皇登之史記秦始皇紀令入海者齋捕巨魚具而  
自以連弩候大魚至射之自琅邪北至榮成山弗見至  
之衆見巨魚射殺一魚正義曰榮成山卽成山也按史  
書及前代地里書竝無榮成山予向疑之以爲其文在

琅邪之下成山之上必勞字之誤近見王充論衡實知  
篇引此正作勞成山乃知昔人傳寫之誤唐時諸公亦  
未之詳考也遂使勞山併盛之名成山冒榮之號今特  
著之以正史書二千年之誤

辨東牟侯興居

一統志登州府名宦下云劉興居高祖孫齊悼惠王肥  
子誅諸呂有功封東牟侯惠澤及于旁人至今廟祀不  
絕考史記漢書本紀年表興居以高后六年四月丁酉  
封孝文帝二年冬十月始令列侯就國春二月乙卯立

東牟侯興居爲濟北王其明年秋以反誅是興居之侯  
于東牟僅三年其奉就國之令至立爲濟北王相距僅  
五月其曾到國與否皆不可知安得有惠澤及人之事  
歷二千年而思之不絕者乎甚矣修志者之不讀史也



遊勞山記

清 虞山張道浚

著

泰岱雄峙震方支分派衍磊磊落落直走海涯如子孫  
羅列於前莫敢抗視獨卽墨有山環海百餘里名勞盛  
羣峰複嶺萃嶽而起齊記稱泰山高不如東海勞昔傳  
吳王夫差於此山得靈寶度人經又寰宇記言始皇登  
勞盛望蓬萊以勞於陟卽名勞又以驅之不動稱牢及  
考列仙傳樂正子長遇仙於此山得赤散丹以長年邱  
長春謂三圍大海背負平川真洞天福地名不佳而易

學海類編  
卷之三  
遊覽  
爲鼇有詩云卓犖鼇山立海隅霏微靈秀出天衢羣峰  
削蠟幾千仞亂石穿松一萬株又云牢山本卽是鼇山  
大海中心不可攀上帝欲令修道果故移仙跡近人閒  
李青蓮亦有我昔東海上勞山餐紫霞之詩結云願隨  
夫子天壇上閒與仙人掃落花則知山實仙靈奧區僻  
處海曲舉世鮮聞卽聞之亦未易躡屩而登得窮其奇  
盡其變也康熙甲戌余自薊北返而東遊潘太史雪石  
謂余曰子之遊不虛也殆將登大小勞而極海山之勝  
乎且爲具言其槩余心慕之三年願莫能申丁丑四月

旣望刺史陳君按行部內余得偕過不其城與會適逢  
因攜一童子周燮入山一府役章姓引導馬一騾二由  
城東南行三十里羣峰當馬首疑絕人徑忽爾峭壁雙  
開松風夾路而入約二里許名峽口旁有古寺廣庭無  
他物惟藥品幾種曝日下香氣觸鼻觀道人知醫時以  
濟人走塵市余獨坐旛影石壇上久之迤邐而東地復  
廣衍不知爲眾山深處雲開霞捲登一小峰名小蓬萊  
邑中藍氏  
讀書處忽得東海全勝銀濤萬頃之上南望紫翠千層隨  
波蕩漾靈異不可名狀恨不得卽插翅飛去童子牽衣

學海類編 卷之二 遊覽  
遽下遵大路折而南十里至冷哥莊憩修真菴松閒犬  
吠道童知客至拾松枝烹茗相款時邑侯龔君銓楚人  
也命候人設雞黍於此余知而止之與一蒲團上人共  
蔬飯飯罷循山東向卽前南望諸峰亂石嶙峋轉折成  
路馬蹄蹭蹬難前行山麓十餘里陡躋絕巘緣峻壁仰  
摩蒼穹俯臨萬仞心驚目眩不知所措山腹仄徑蜿蜒  
盤空凌虛不得不釋鞶曳杖又行十里許兩足下巨石  
劍攢浪花乘風搏激雪捲雲翻頃刻萬狀昔稱孫位畫  
水幾於道恐見此筆底亦將窮矣空洞中有聲如雷時

殷林木復恍惚見龍光魚影鶴駕鸞車翻飛於虛無瀾  
茫之間直抵於扶桑析木窮荒極島之外兩目收拾亦  
大矣哉徑隨峰轉雲傍人飛於橫溪絕壑中度飛仙橋  
進一道院寂寥古殿丹竈依然此太平宮也上有白龍  
老君華陽諸洞捫蘿攀磴而上備歷幽絕時日已西下  
斜陽挂松林二十里之間鬱鬱蒼蒼松多千百年物蚪  
枝鶴骨有挺然千尺凌霄而具擎天蔽日之槩者有周  
圍合抱而橫枝礪礪蹙縮儼然龍攣虎跛之狀而高不  
四五尺者有遠架巖壑而岸然高視者有倒托懸崖如


俯首恭而揖者或三五竝列於前或一枝獨秀於後或兩相糾纏結而爲門或分行排立整如部伍而不錯亂跬步更有瓊葩珍卉繇谷沿溪奇獸珍禽依人不擾莫可名識者由是直抵華巖名庵山多伐毛洗髓之流獨此庵爲釋子道場邑人黃氏所創於茲未久故講殿禪堂虛廊峻閣佛像法相繪蓋幢影之類靡不嚴整勝於他處坐倚十閒樓頭聽清梵琅琅出山坳樹隙閒與海潮相和應夜半尋大悲閣僧岸先萬修話凭欄瞰海正當月臨峰頂潮上山腰覺三千世界無非銀溶冰結藐然

一身直與清淑之氣相融洽鷄鳴僧拉躋最後高峰日極滄溟波平際天見雲霞五色中擁出丹砂輪影疑陽鳥已離暘谷孰知少頃焜煌閃爍如鎔金爐鼎方由一線而全升初猶泚泚漾水光中也一輪初上山耶水耶人耶物耶由晦復明光華四散真目得未曾有僧言海氣氤氳晨曦恆晦若此纖悉畢現人不數見者也徘徊久之軒衣而起僧摘山蔬供麥飯味澹而甘亦非人世閒所常服乃塵絆未釋不能蹤步華樓巨峰之勝遽與諸僧別於塔院前清渠一泓澄澈見底金魚可百許游泳

學海類編 卷之四 遊覽  
自若初不知有人之樂其樂者并不知十步之外更有  
大洋之可樂也僧訂後遊余曰縱不得靈經異丹以求  
長年仍當蹤步華樓巨峰訪青蓮掃花壇上固所深願  
遂循路而返重過修真尋蒲團上道人叩其姓氏不言  
其蒲團上歲月亦不知幾何矣贈余藤杖一枝枝節離  
奇色如朱漆卽山中物歷年滋久者受之將歸奉母壽  
薄暮抵城中刺史公叩余所遊口不殫述因書一二於  
此以示之至山之高未知果能出於泰岱否周官太史  
氏職掌天下輿圖海嶽鎮瀆必能考核得實何時得繼

見潘太史當復質之

真器太史當身錄



古杭雜記

宋西三賢李實有詩人撰

理宗庚申賈似道初入相有人作詩云收拾乾坤一擔擔上肩容易下肩難勸君高著擎天手多少傍人冷

眼看

晉郭璞錢唐天目山詩云天目山前兩乳長龍飛鳳舞到錢唐海門一點巽峰起五百年閒出帝王及高宗

中興建邦天目乃主山至度宗甲戌山崩京城騷動時有建遷蹕之議者未幾宋鼎遂移有人作詩云天

學海類編  
目山前水齧磯天心地脈露危機西周浸冷觚移月  
未必遷岐說果非  
開僖韓侂胄開邊隙至函其首以乞和太學有詩云晁  
錯既誅終叛漢於期已入竟亡燕  
驛路有白塔橋印賣朝京里程圖士大夫往臨安必買  
以披閱有人題于壁曰白塔橋邊賣地經長亭短驛  
甚分明如何祇說臨安路不較中原有幾程  
寶慶丙戌袁樵尹京於西湖三賢堂賣酒有人題壁曰  
和靖東坡白樂天三人秋菊薦寒泉而今滿面生塵

士卻與袁樵課酒錢

太學服膺齋上舍鄭文秀州人其妻寄以憶秦娥云花  
深深一勾羅襪行花陰行花陰閒將柳帶試結同心  
日邊消息空沈沈畫眉樓上愁登臨愁登臨海棠開  
後望到如今此詞爲同舍見者傳播酒樓妓館皆歌  
之以爲歐陽永叔詞非也

婺州劉鼎臣赴省試臨行妻作詞名鷓鴣天云金屋無  
人夜剪繒寶釵翻過齒痕輕臨行執手殷勤送襯取  
蕭郎兩髻青聽祝付好看成千金不抵此時情明年

學海類編  
宴罷瓊林晚酒面微紅相映明

易祓字彥章譚州人以優校爲前廊久不歸其妻作一  
剪梅詞寄云染淚修書寄彥章貪作前廊忘卻回廊  
功名成遂不還鄉石作心腸鐵作心腸紅日三竿懶  
畫妝虛度韶光瘦損容光相思何日得成雙羞對鴛  
鴦懶對鴛鴦

三山蕭軫登第榜下娶再婚之婦同舍張任國以柳梢  
青詞戲之曰掛起招牌一聲喝采舊店新開熟事孩  
兒家懷老子畢竟招財當初合下安排又不豪門買

獸自古道正身替代見任添差

理宗朝嘗欲舉行推回畝田之令有言而未行至賈似  
道當國卒行之有人作詩曰三分天下二分亡猶把  
山川寸寸量縱使一邱添一畝也應不似舊封疆又  
有作沁園春詞云道過江南泥牆粉壁右具在前述  
何縣何鄉里住何人地佃何人田氣象蕭條生靈憔悴  
經界從來未必然惟何甚爲官爲己不把人憐思  
量幾許山川况土地分張又百年四蜀巉巖雲迷鳥  
道兩淮清野日警狼煙宰相弄權姦人罔上誰念千

學海類編 古詩雜記 三 遊覽  
戈未息肩掌大地何須經理萬取千焉  
蜀人文及翁登第後期集遊西湖一同年戲之曰西蜀  
有此景否及翁卽席賦賀新郎云一勻西湖水渡江  
來百年酣醉回首洛陽花世界煙渺黍離之地更不  
復新亭墮淚簇擁紅妝搖畫舫問中流擊楫何人是  
千古恨幾時洗余生自負澄清志更有誰磻溪未遇  
傅巖未起國事如今誰倚仗衣帶一江而已便都道  
江神堪恃借問孤山林處士但掉頭笑指梅花蕊天  
下事可知矣

項羽廟在臨安近郡三衢十入里頭樟戴市市人失火  
延及斯廟人有詩曰嬴秦久矣酷斯民羽入關中又  
火秦父老莫嗟遺廟毀咸陽三月是何人

淨慈寺乃祖宗功德院側有五尊羅漢別創一田字殿  
安頓裝塑雄偉殿中有千手千眼觀音一位尤爲精  
製其第四百二十二位阿溼毗尊者獨設一龕用黃  
羅爲幙幙之傍置籤筒一座其像側身偃蹇便腹斜  
目覷人而笑臨安婦人祈嗣者必詣此炷香默禱以  
手摩其腹云有感應曰積月久汗手加于泥粉之上

其腹黑光可鑑邪說誣民如此又假此以爲題化之  
端斂掠民財不可勝計其無忌甚矣  
史彌遠作相時士夫多以鑽刺得官伶人俳優者一人  
手執一石用一大鑽鑽之久而不入其一人以物擊  
其首曰汝不去鑽彌遠卻來鑽彌堅可知道鑽不入  
也遂被流罪

舊傳三歲拜郊或明堂大禮所有在前誤國姦臣首級  
在大理寺者必以文祭蓋訛傳謂以污穢之物祭之  
其實乃少牢也其文云國家于三年恩霈汝雖誤國

然今亦不忘汝之舊特用以祭繆傳若此豈朝廷寬  
大之恩哉

杭州市肆有喪之家命僧爲佛事必請親戚婦人觀看  
主母則帶養娘隨從養娘首問來請者曰有和尚弄  
花鼓棒否請者曰有則養娘爭肯前去花鼓棒者謂  
每舉法樂則一僧三四鼓棒在手輪轉拋弄諸婦人  
競觀之以爲樂亦誨淫之一端也

賈似道母兩國夫人本賈涉之賤妾嘉定癸酉涉爲萬  
安丞似道在孕不容於嫡縣宰陳履常新淦人也涉

與之通家往來以情告之遂相與謀陳宰令其妻過  
丞廳之次諸妾環侍談話間因語丞妻以乏使令欲  
借知事一妾丞妻云惟所擇用陳妻遂指似道之母  
丞妻幸其去欣然許之卽隨軒以歸縣衙及八月八  
日似道生於縣治賈承檄往他郡歸謁于宰始知之  
終不復入丞廳後改任雖攜似道歸鄉而其母竟流  
落及似道鎮維揚子母方得聚會享富貴數十年咸  
淳甲戌以壽終似道歸越治葬朝士貴戚設祭饌以  
相高爲競有累至數丈者裝祭之日以至顛死數人

送葬者值水潦不問貴官沒及腰膝不得自便雖理  
宗度宗山陵無以過之其冬北兵渡江似道潰師  
寶祐乙卯御史洪天錫劾內臣盧允升董宋臣疏不行  
六月御筆御史丁大全除司諫御史陳大方除正言  
正言胡大昌除侍御洪天錫遂左遷時天下目丁大  
全陳大方胡大昌爲三不吠之犬

溫陵呂中作國史要略謂南渡之後一壞於紹興之檜  
再壞于開禧之韓三壞于嘉定之史愚亦謂理宗四  
十年在御一壞于嵩之再壞于大全三壞于似道也

相之壤國如此哉

再對千關會大韓三對千壽出之史愚亦臨登宗四

盈刻台中并國史要御情南新之第一氣刻臨興之劍

全刺大武能大昌無無不知之大

五言賦大昌劍對臨斯天殿登空殿御天不目下大

六伏聯筆聯史丁大全劍后結臨史刺大武劍五言

寶物之聯聯史斯天殿殿內引劍余長董宋由殿不奇

宗對宗山劍無以敵之其冬山兵齊武師難實相

錢錢各道本新不問貴許如外對劍不特自對觀野

金華游錄

宋東陽方鳳詔卿撰

己丑歲正月謝翱皋羽方鳳詔卿約遊洞天十一日辛  
卯詔卿攜子肖翁入邑與皋羽及陳公凱君用弟公舉  
帝臣會詔卿夜賦詩示同遊者十二日壬辰陰寒詔卿  
拂曉取上洛之吳溪過吳似孫續古約俱行至橫溪訪  
柳時聲父子君用不至帝臣從五路嶺先過門皋羽繼  
至會宿時聲居十三日癸巳枕上聞雨是晚以雨宿柳  
明府新居各賦一首十四日甲午陰未曉卽行午度太

陽嶺晚泊上坦欲訪雙巖鄭子有子有聞之先至旅寓  
邀宿陵雲山房城友葉謹審言適相遇於陵雲約翌日  
同至赤松是夕子有出家藏先資政北山先生遺墨及  
久近諸賢書帖共觀至夜分詔卿書北山感雪竹賦後  
皋羽亦題十五日乙未曉聞窗外葉聲疑雨起而視之  
則霽既飯話良久子有之姪復畱飲凝香閣晚抵赤松  
自源口入一里許萬松矗翠有亭跨中路扁赤松山舊  
樞密潛齋王公埜書今往觀唐元素易以他書矣沿溪  
入橋亭扁金華福地郡人潘繼先篆過橋入三門勅寶

積觀額大中祥符元年所賜與殿中四錦旛及獻花四  
木孩俱今猶存入門而右有堂臨池上爲濯纓堂默成  
先生潘待制良貴書入而爲松遊亭又入而爲枕流亭  
觀之前爲臥羊山卽皇初平叱石成羊處也道士王元  
台謝天與款宿謁冲應養素二真祠二真初起初平兄  
弟也松下有遇仙石坐其上相傳往年唐公李度有目  
眚寓觀中嘗憩茲石遇二仙問故采草拂其目遂明且  
祝曰後十八年當相見彬州及唐登第授彬教有二道  
士過之唐不知省道人曰子亦記松下治眼時語乎旣

而邀之不知所適方知爲一仙云時詔卿病目甚故道士言之爲詳回宿王謝房各賦上元遊赤松詩十六日丙申微陽道士水竹唐元素妙虛王德厚竹泉倪守約房中觀羊石其詳具皋羽觀羊石記中云金華洞爲皇初平叱石處予髻而聞之髮種種乃一至而叱石處復不在金華洞未至洞十五里有山曰赤松今爲寶積觀觀旁祠二仙二仙卽皇初平兄弟是其處也石故在山之巔變怪牴牾宛然如羊形多爲樵牧及好事者取去道士拾其餘蓄觀中余得借而觀者三處其一在天井

東僅十數角嶄然羣伏且起狀無抵觸意苔蒙茸若草藉地可近而玩其一泣曲池之岸纍石爲山參布伍列犬牙其上臥者十八九伏者十七抵者蹶者十五履險而跛者十三倚而齧跪而乳者十一若觀古彝尊之跡于石形不求全而意自足其一積小坻位置加密跂伏齧乳抵蹶與前變態略同復有拱而入立者奇崛特甚非前所有道士易以他名使不與羣羊伍余曰是不可易左元放之遇曹瞞其化而爲羊與茲羊之化爲石是或一物也今而後觀茲石馮而遊若脫而休茫乎日與

學海類編 卷之三 金華游錄 三  
之對而泊不知所求其有不復化爲是物乎道士顧笑  
眾皆沈寂起立若植以余言爲然故書以啓後之遊者  
其所觀後之三處道士曰倪守約唐元素王德厚云石  
去初平仙後若干年爲樵牧好事所取又若干年爲樵  
牧好事所取又若干年道士悉能言之于遊者非有繫  
故不書妙虛石旁有方竹一叢蕭疏可愛堂名蕭閒樓  
有減筆隸物化二字極佳水竹畱饈玉倪各爲煮茗入  
小桃源路口有小桃源物外洗耳三石刻奇古皆餘杭  
虞似良仲房八分書未過橋爲物外亭過橋有亭泉上

有臺名滄浪溪石皆磊砢水激射爲峭峽爲盤渦道士  
徐南華攜酒餽并青窗王易所書趙元清夢游小桃源  
四時詩來青窗卽故樞密王公之孫名進思官惠院號  
淳齋善書而好吟以避世立兄子爲子使出贅復分田  
送其妻歸母家而自爲道士于此南華酌酒滄浪臺榭  
陰下行至巖扉閒新構小亭名別有天地復酌亭上巖  
扉有諸公題墨新種桃梅夾道道士周雲巖世昌要會  
酌樓上石泉之徒王德謙益之攜琴鼓再行午從觀右  
登丹山行窮林巨石閒觀丹竈及丹石相傳某年丹光

見石上有道人養雞見雞啄丹取之丹卽飛去今立祠  
與庵祠前舊有老樹竝其中斷倒架上半于其一附  
著而生下半則僵立不相接狀甚怪奇今爲改祠道士  
伐去曾遊者以爲言丹山而左稍下有丹井泉極甘冷  
一徑出小桃源之上抵二仙祠回宿寶積觀中西廡石  
刻赤松山三大字李陽冰篆偉甚以赤字從大下作火  
揭之有火災故寘不用而存其跡云十七日丁酉雨欲  
往三洞不可遂入城泊祥符寺待霽取道智者以往十  
八日戊戌雨畱祥符皋羽有塔影霧中深之句韶卿足

之十九日己亥陰入寶婺觀謁星祠登八詠樓寶祐丙  
辰歲郡守謝奔修改創濤齋王埜書扁今易以他書矣  
時拏丁夫急所帶奚奴不敢出市衢韶卿自同皋羽訪  
芙蓉盛太博共談世故晚歸祥符二十日庚子新霽約  
審言自蘭溪門會于北柵韶卿父子續古審言登七寶  
寺塔樓拂塔院至道年碑石遇且庵徐玉汝於盧士安  
卜肆韶卿皋羽甚欲畱訪諸老以雨餘得霽重于妨眾  
遂行旣出城遇抑齋劉權院梅居邵深道成齋王玉成  
于菱塘之東王謝二道士自赤松來西鹿田守僧懷玉

留而相導韶卿賦北山道中眾客皆和哺至智者寺山路有亭扁北山唐乾元二年八月縉雲縣令李陽冰篆書入而為倚松亭過橋有亭扁靈源小憩亭上又潛齋王公書靈源勝地四大字寘之雲堂後廡寺僧莫之貴也日夕過鳳凰山法清院山形如鳳凰舊為法朗石晉開運二年為國泰今改法清山西有一怪松偃蹇如盤龍院僧圓矩云昔潛齋王公嘗護以闌楯遊憩其下是夜宿院中二十一日辛丑有徐生館法清酒狂士也曉起攜詩見贈有鳳凰山上鳳凰翔之句聯中又以畊田

鹿化石羊為對臨別密謂審言曰余以鹿比僧羊比道士鳳凰比諸君子審言途中述其語眾皆絕倒從法清而西過故康懿泰國長公主墳園未至觀半里有歧徑行五十里至金華觀登山可至九龍寺上有劉先生講堂劉孝標讀書處也三洞上為朝真中為冰壺下為雙龍三石扁皆飛帛書立下洞口觀有天下名山四大字觀之左為椒亭所從入洞路也以山下平地言之此則山巔然而迢遞寬衍觀之前居民成聚則此乃洞天之趾爾雙龍洞口石室明淨坐可三二百人仰視石室紺

碧其隱約可名狀者爲雲物爲仙桃爲道人比肩而立  
龍首見其左而尾懸右石壁上又懸石至地獨黃色俗  
呼呂先生藏身霞衣挂其旁有北斗星窠洞穴如蟆頤  
水淙淙從中出卽流入右偏暗出洞外溪澗眾束炬揭  
裳偃僂踏水入內洞凡三數丈首背皆擦石舊臥小舟  
而入今敝漏閣水際旣入復虛曠如外洞水從右流莫  
測其淺深執炬者一一相指告見蜂窠石水蛙石石鐘  
手槌之鐘聲仙珠纍纍貫巖上石門限雪山山前雪山  
後雪梁之皎然仙笠懸巖石石鼓槌之鼓聲有形蜿蜒

頭角髮尾凡二屈蟠隱見爪尖皆白石如玉所謂雙龍  
也貓一獅子一頭足尾具額有珠大龜黑色白蛇斜繞  
其背首入甲下奇甚筆格一霜崖粲如繁霜有卷石小  
竅指面大有水正滴竅中名仙人硯滴候片時纔一滴  
仰視洞中他無漏泉獨此爾浴室石櫺三足蟾懸鐘寶  
蓋如名利講臺上所設而加高大海角虎蹲立雲霞五  
色欲飛極裏從暗處俯伏遠望洞口水中所從入處僅  
一小隙透明如十五夜月名仙人望月又大象足二小  
一仙桂水波石粼粼然大者如浪轉雪山後而左爲滑

臺爲池爲田畦町高下可數仙人挂衣橫十數丈衣純素祛褻蹙摺皆天成又仙人眠石方整可臥仙人帽日月二宮復從洞口踏水而出凡洞中所見不假一毫鑿鑿而形狀自然其妙處殆不可言也登山幾半里至中洞洞口視深處乃暗穴但聞潺潺水聲束數炬相後先若入井然稍斜向內眾魚貫而下石滑且險約三十丈至水簾自高巖噴出下有巨石盛之卽不知水之所往水簾出處前有懸石如鐘又如飛鳳視水簾以下復沈沈深黑人多不敢復入皋羽毅然揚炬而前詔卿續古

從之由水簾之右轉而深入巨石無數回視水簾乃在目前愈入愈深下復無水有石筍入空曠中高可三四丈色瑩如玉從石筍而下極底有石室燥潔曾遊者畱題在焉回至水簾漸可望明而上不如入之險也然不能深入則不得盡其奇來遊者率望水簾而止爾又登山二里詔卿父子皋羽續古倩兩山童買竹薪束炬至上洞入洞而右爲觀音洞從巖罅越石限而入展轉愈高攀援至觀音前其石像天成垂衣伸一足如土偶者但高人巖罅以炬燭之僅得其半而臂與面莫盡見也

旁有潭深不可近名觀音井又名龍潭復路出從大洞  
正面而入歷三數坡陀其石上雲霞波浪霜雪屋室之  
類皆不減下洞所見洞口天日之光斜射洞中石崖上  
淡如月色奇甚內有石梁高挂深可二三十丈白龍護  
其左蒼龍護其右又入有天池深廣四畔峻壁不可下  
池之裏有崖如兩扉而啓其一極黑暗中遠望石扉啓  
處天光下燭蓋洞天漏明而人莫知其處名一線天既  
隔天池不得復深入也雙龍洞口題名石上詔卿賦三  
洞云金華北山三洞天垂髻欲往金華顛春風吹衣雨

洗履瘦筇忽拄蒼山煙山高地平走幽澗根絡石上森  
枿梗步從飛橋瞰石洞厓色闕世知幾年風痕霧迹化  
異物龍首昂左尾右旋就中暗穴如蟆頤急水瀉碧鳴  
媧絃遡流束炬照徒涉肩皆擦石行拳攣水窮路夷內  
景得以炬交燭窮幽元細紋蹙波湧浪接皎彩凝雲飛  
霜鮮大爲獅子虎犀象瑣碎亦復蜂屯然蜿蜒雙蟠角  
尾具一一玉爪拏蒼堅窮龜負甲色深墨長蛇白質相  
縈纏鐘能鐘聲鼓能鼓不假樅簾知誰懸直櫺斜檻藏  
漏室短畦長町移原田青雲白霓五色霞笑盡敗絮畱

丹鉛中途經過最深窅伏身低眺洞口泉空明一隙隔  
遠見秋蟾浴海光嬋娟左巖袞衣頗橫巨壘摺眾皺垂  
蹠躔自餘神怪不可極似鑿非鑿鑿非鑿出登山腰叩  
中洞外視石井聞潺潺入深踏險思搥縷長竿揭炬後  
且先水簾可俯心爲掉到此十九歸言遄嗜奇不憚歷  
磊砢足以目故差輕便翻身卻望水簾處銀河天落懸  
吾前常情疑復下百尺積水定作神龍淵石乾徑闢卻  
易進玉筍拔地修而圓宜爲淵處乃爲屋亦或摩抄題  
新篇同遊疑我久未出笑謂豈欲井底眠林幽風起日

已晚猶睨高洞山之巔薪蒸可買樵我導不遠數里仍  
攀緣傍從右壁入深圻如鐵戶限瓊爲檐儼然海相挂  
珠絡熟視豈信非夸傳左爲朝真正面入便想笙鶴遨  
羣仙雲霞波濤仙衣裳奇詭豈必下洞專歛然修梁架  
巖起左右蒼白龍形全望中極底勝漆黑雙扉隱隱起  
半邊天光一道燭扉內知此明罅從何穿窗深壁峭不  
可往安得插羽如飛鳶嗟余茲遊尚牽俗身所驟歷辭  
難宣但思乞水學坡老洗眼看字消餘年是夕僧懷玉  
同歸西鹿田寺止宿寺丈室後有奇石峭立罅圻閒可

行林泉幽勝特甚默成先生潘公大書其處云余往來  
南北兩山餘二十年獨未曾至鹿田紹興七年四月十  
七日同智者長老法銓來于崎嶇險隘之中得虛曠寬  
閒之地修篁喬木巨石瀑泉氣象雄偉此蓋未之見不  
獨甲于金華也自是評吾鄉山水以此爲第一云其丈  
室遂榜第一軒上爲思賢閣是夜聽雨軒中二十二日  
壬寅曉霽過東鹿田寺廊廡列詩石內有葉丞相衡集  
杜五言四韻其二聯云水花分塹弱山木抱雲稠更宿  
招提境還從惠遠遊又僧舍壁閒有郡倅金陵吳琳題

詩中一聯云雲暗雨來疑是夜山深寒在不知春潛齋  
王公嘗和其後行數里至潛齋所營山橋穆陵御書山  
橋書堂四大字下有懶瓚巖巖上有亭亭之西有石筍  
又旁巖臨溪爲亭臺遠望州城城中之塔鑽小雙溪如  
篆紋路口有亭扁北山今亭臺皆蕪廢旣下山王謝道  
士登山取別往歸赤松至潛岳寺前帝臣審言同入城  
韶卿皋羽續古肖翁取赤松源口虎頭巖下道遇雨抵  
上坦旅宿二十三日癸卯曉霽近午度太陽嶺晚宿柳  
時聲居聖傳之蘭溪畱詩以待續古先歸二十四日甲

辰過松巖陳粹翁午與皋羽別晚復雨二十五日乙巳  
韶卿父子回抵吳氏書塾客有問金華勝遊者韶卿以  
詩叙其槩云赤松上下雨霏微八詠樓頭重拂衣西港  
晴來汀草長北巖幽處洞泉飛風敲定磬鹿春過月滿  
丹臺鶴夜歸歷覽因知古詞客盛誇雲夢未全非皋羽  
歸後作金華洞人物古蹟記

嘉禾百咏

胥山

宋 秀州張堯同

著

胥山

馬革浮屍去君王太忍人此山空廟貌何以勸忠臣

附考山在郡東二十五里接嘉善縣境一名張山乃

硤石之餘支也吾郡諸山自天目發源盡于海鹽北

一支由硤石蜿蜒而來發爲胥山平田突兀廣尋數

畝舊經云子胥伐越駐兵于此水經云子胥死浮屍

至此居民憐之立祠其上俗名伍王廟旁有石龜凝

望注水風雨中農人見其行疑爲怪鑿其目碑語有石棧自錢塘抵禦兒之胥口凡十一字惜不得其全文又有磨劍石長二丈許劍痕在焉其巔相傳卽子胥墓也括異志云隆興閒守臣李春請撥隸郡學以荒山皆石不果鄉人陳了翁之裔陳奎鑿石結廬名讀書堂下有水曰胥江屠應俊有胥山賦其地題咏甚眾八景之一曰胥山松濤

### 笈山

丹龜功成後寥寥掩竹扉但聞蟬已蛻不見鶴來歸

附考山在府城西南五十七里舊屬嘉興今析屬桐鄉縣東南三十五里千金鄉昔有道士笈基尸解于此唯存巾篋葬之號桐棺冢山有兩峰東峰號史山明初貝清江朱以貞結笈山詩社後郭觀察舜舉吳洪雅公治西林僧公朗輩繼其盛云又有洗藥井藏兵塢潮音院顯靈廟宋係時祀三衢周孝子封顯靈王者慈烏泉碣石岳陶隱居真誥云嘉興笈季真于宋景和元年得晉楊許三真手蹟于剡縣馬氏以呈廢帝又陶隱居弟子題名有嘉興笈興祖

澎湖

四境田相接烟瀾自渺瀰客來吟此景無或比漉池  
附考湖在郡城東南二里春波門外一名馬場湖宋  
志云闊五百丈深三丈北鄰城壕東列廛市其西則  
鴛湖也亦名南湖湖濱有濠股塔湖南有樂郊水心  
列岫三亭及潘尙書園中有烟雨樓俱另見

鴛鴦湖

東西兩湖水相竝比鴛鴦湖裏鴛鴦鳥雙雙錦翼長  
附考湖在郡城南三里澄海門外湖中多鴛鴦故名

人云以東西兩湖相麗如鴛鴦也亦曰雙湖總名南  
湖宋從事郎聞人滋南湖草堂記云橋李澤國也東  
南皆陂湖而南湖尤大計百有二十頃元陳世昌有  
南湖賦湖中有裴島放鶴洲諸勝又名陸瑁養魚池  
八景之一曰鴛湖春曉

長水

古來名未滅人好水還清一讀高僧疏塵勞悟此生  
附考水在郡城南六里長五十餘里自海甯發源貫  
硤石東北流入嘉興境始皇東遊過此聞土人水市

之謠乃乘舟交易以應之宋時有長水法師明沈懋  
孝學者稱長水先生

古水谷水

一作許尚詩

短棹經行處風披藻荇香中宵孤鶴唳片月在滄浪

附考舊經云古戰場夾谷口秦長水縣治今谷水是  
也神異傳曰由拳縣即秦長水縣淪陷爲谷因名谷  
水東南流逕嘉興縣城西又東南逕鹽官縣故城南  
水經注引吳記曰谷水出吳小湖逕由拳縣故城下  
九州志云谷水之右有馬宰城吳王濞煮海爲鹽于

此梁元帝元覽賦曰時度谷水之陽尚想嘉禾之方

杜慶亭于吳后雄構李于越王陸機對晉武云三泖

冬溫夏涼谷水在其北金澤章練小蒸大蒸白牛諸

塘在其西葑澳走馬諸塘在其東泖橋之外橫絕東

渚者秀州塘也又吳地記云海鹽縣東北二百里爲

長谷陸遜陸凱居此又云嘉興縣東二十五里有長

谷亭方輿勝覽云陸遜所封名華亭谷嘉禾志云當

湖北有華亭河然則一水異名大抵自浹石襟帶吾

禾數邑以至于泖耳

天星河

拍岸浮春綠菰蒲四遠生網羅人不到魚鳥亦忘情

附考河在郡城內東北一名天心河宋嘉禾志云東西廣三十四丈卽始皇發徒所掘俗謂天心墜穴泉與海通故大旱不涸水草不生旁有碑存二十餘字剝蝕不可讀

穆溪

靜練明田外源流笠澤通不因逢歲旱誰識濟時功

附考溪在郡城東北四里接上谷湖入太湖水中多

龍骨

韭溪

終與雙溪接分流入郭來市橋人影合不解洗塵埃

附考溪在郡城內卽南湖之支流經城而達于北運河川瀆記云太湖東通嘉興韭溪是也溪上有西澁里見搜神記

雙溪

柔櫓聲相應名齊漢魏收可憐一溪水分作兩塘流

附考溪在郡城東六里以其近漢塘魏塘故名漢塘

入平湖魏塘入嘉善俱可由此以達松江

### 秀水

好景明于畫長浮五色波一竿吾欲釣來此聽漁歌

附考水在郡城北麗橋之東相傳水浮五色見者獲慶亦稱繡水明析邑名因此

### 白龍潭

呼吸風雲合飛潛自有時只愁潭底淺頭角被人窺

附考潭在郡城西南四里通越門外景德寺旁有白虎穴風濤湧舟作三塔鎮之今析屬秀水境入景之

### 一曰龍潭暮雲

### 禦兒

用此臨吳戰何人爲越謀夫差曾不寤亡國始知羞

附考水在郡西南去崇德縣治東南一里舊名禦兒中涇俗名沙渚塘吳越時棲兵于此越語句踐之地北至禦兒左傳吳越春秋皆作禦史記年表作禦西漢易爲語而年表又作蘓水經曰由拳西鄉有產兒便能語因詔爲語兒鄉元豐中朱長文續吳郡圖經云范蠡獻西施于吳道中生子至此能語張宮諭廣

皇輿考亦云又越絕書曰語兒鄉故越界大夫種曰  
吾以禦兒臨之又女陽亭者句踐入官于吳大夫產  
女此亭養于李鄉句踐勝吳更名女陽三朝國史云  
有語兒亭又名女兒亭俗呼女兒墩漢元封初封轅  
終古爲禦兒侯

### 范蠡湖

少伯曾居此螺紋吐綵絲一匳秋鏡好猶可照西施  
附考湖在郡城內西南金明寺旁中產異螺五綵相  
傳范蠡曾隱于此有陶朱公里四字碑又有西施妝

### 臺

#### 梧桐涇

落落梧桐樹何年作鳳鳴試看千古翠流盡一溪聲  
附考涇舊屬郡境後析桐鄉縣名因之在邑之東卽  
濮川所通處也五代時鳳鳴其樹邑人蔡孟熙繪圖  
廬陵周忱爲記

#### 汾湖

我是滄浪叟閒來繫釣艫如何一湖水半秀半吳江  
附考湖舊屬郡境後析嘉善在縣西北三十六里其

半爲吳江地故名分湖後人加水爲汾耳中產巨蟹  
陶振有賦楊惟楨有記

### 柘湖

神居陰陽護尋國捍洪波莫慮蛟龍怒年來畏叱呵

附考湖舊屬郡境卽海鹽舊治淪陷者也今在平湖  
縣華亭鄉與嘉善接境東界華亭今無復有湖凡張  
堰亭林黃茅白葦之墟皆是也多生柘樹故山名柘  
山林名柘林柘一作橐初陷時有女子入湖爲三姑  
神土人祠之

### 馬塘涇

疑著風波惡民謠亦畏人築塘成堰後斬馬祭河神  
附考涇在郡城南七里九域志云始皇至此遏水爲  
堰斬馬祭之屬嘉興

### 杉青堰

舊吏家何在空尋古柳隄世情今亦爾莫笑買臣妻  
附考堰在郡城東北四里其旁有閘寰宇記謂朱買  
臣妻改嫁杉青閘吏北一里有死亭灣爲妻死處又  
有落帆亭宋秀王諸公送鄉人陳確持節江東畱題

亭址今析屬秀水八景之一曰杉間奔湍

鳳凰洲

竹秀水色淨忽來雙鳳凰岐周昔鳴瑞今復見文王  
附考洲在郡城東七里宋隆興元年有五色鳥飲啄  
其上故名屬嘉興

龍舌頭

一吸長川靜烟雲忽有無誰看頷底月誤欲探驪珠  
附考在郡城東七里卽雙溪之觜也今名會龍山屬  
嘉興

月壕

入徑深於塢滄波近馬蹄每尋蓮社友咫尺走東西  
附考壕在郡城西其水抱城灣曲如月故名亦曰月  
河屬秀水

靈光井

玉鬢祥光發難藏世上名定多慈護力一飲百疴輕  
附考井在郡城內精嚴寺本晉徐熙之別業因夜發  
光捨爲寺成帝賜名靈光

幽瀾泉

神女鍾靈處真堪療渴羌滿巖秋玉色一酌灑清涼

附考泉在景德寺中舊屬郡境後析嘉善去縣東一里相傳有僧見一女子厲聲曰窗外誰家女應曰堂中何處僧逐之忽隱掘得石刻有幽瀾二字石下得泉大旱不涸煮茶無滓盛暑經宿而味不變邑人盛唐有記八景之一曰武水幽瀾寺係唐天寶閒創又有大悲閣雨花臺翻經室洗鉢池補衲亭蘿屋月竹爐烟諸勝

### 樵李城

螳螂方捕楚黃雀遽乘吳交怨終亡國君王到死愚

附考城在郡城西南四十五里春秋時越敗吳于樵李因其地產佳李故名越絕書作就李公羊傳作醉里史記載吳王闔閭傷指卒于涇去樵李七里夫差敗越于夫椒報樵李也又曰西施醉于此卽今濮院析屬桐鄉

### 射襄城

此地連江海曾經古戰爭干戈今不見空有射襄名  
附考城在郡城東北三十里吳王禦越之所一名聞

皇清類編 卷之二  
邊覽  
川今名王江涇又東三里爲聞家湖宋聞人氏家焉  
宋武節將軍聞人宣扈蹕南遷定家于此其元孫恂  
爲進義校尉死厓山之難

### 四城

吳越爭雄日區區在用兵空餘爭戰地無處不高城

附考東顧城西新城南子城北主城皆在郡境吳築  
以禦越

### 何城

報越心何壯貪齊計已輕忠言殊不聽何用築斯城

附考郡西有何城在崇德縣西三里又有萱城在崇  
德縣東三十里晏城屬桐鄉管城屬鹽官皆春秋時  
築此四城屬越境

### 由拳廢縣

故城人不見擊劍淚空霑一絕悲聲遠今猶說孝廉

附考在郡城南搜神記曰始皇東巡望氣者云五百  
年後江東有天子氣始皇至令囚徒十萬餘人掘污  
其地鑿審山爲碇北迤六十里至天星河止表以惡  
名曰由拳言因倦也今春波門外合五水俗訛油潭

嘉禾墩

寂寞黃龍後紛然壘上碑廢興無處問空詠草離離

附考墩在郡城東北四里即吳時生嘉禾之地

古戰場

自昔干戈地城空草自荒漁樵懷舊事何敢議興亡

附考在郡南四十五里舊經云古戰場夾谷口即秦

長水縣治也又名吳越戰場其大者曰東蕩界桐溪

鹽官閒西蕩崇桐相半皆廣數十里土人墾地往往

得敗甲朽鏃云

村門口

昔日荒閒地今聞市井喧人情看促迫無後似當年

附考未詳

宣公橋

祇因裴少保功業敗垂成往往橋邊客今猶恨未平

附考橋在郡城東春波門外相傳為宣公建屬嘉興

五柳橋

為懷陶靖節無復見其人誰種橋邊柳猶含舊日春

附考橋在嘉興治西俗名慶豐橋

百步橋

舊址依然在荒墟未百年還分一橋水流入幾家田  
附考橋在杉青堰旁

跨塘橋

路接張涇近塘連谷水長一聲清鶴唳片月在滄浪  
附考橋在嘉善縣西北舊屬郡境

菩薩橋

片雲初出岫南北自飛揚舊日橋邊路猶聞鳥履香  
附考橋在秀水縣治東

竹橋

腰枕政亭北橫斜古渡頭風吹雙淚落恨逐水東流  
附考橋在秀水

河內亭

掾死緣非命兒來哭未休舊時亭下淚疑與水長流  
附考亭在郡城西漢張武父爲郡掾送太守妻還河  
內爲盜所殺武哭于此

嘉禾亭

五馬來何暮經營指一彈石碑書近事畱與後人看

附考亭在府子城內西有嘉禾金風二亭東有清風亭北有利川觀風野泉朝宗四亭又有序賓亭皆宋知州張瑜建

列岫亭

吾州風物好惟是欠青山忽有洞庭色來從一笑閒  
附考以下三亭俱在澎湖之南

水心亭

波光磨不盡鏡面絕纖塵照得紅亭子亭亭似美人

樂郊亭

竹下清風好時來挂幅巾待逢田叟問知是樂郊人

會景亭

有景道不出須來此水濱十分清絕境團作一亭春  
附考宋尚書潘師旦園在澎湖濱中有南塢海棠亭白蓮沼桃花亭紅薇逕茶溪仙鶴亭芙蓉塘白苧橋漁漁十景咸會于此故名園舊屬柳氏師旦知秀州重築趙孟頫有記

南塢

岸回波曲曲城轉草層層忽見桃花落還知到武陵

海棠亭

薛砌迎烟渚花開忽滿株春風吹爛漫如展蜀川圖

白蓮沼

滄波圍四面豔豔玉開花自可除簾幕清香不用遮

桃花亭

不待東風折池塘已自春試看原上客猶恐是秦人

紅薇逕

漸放秋風晚花無爛漫香淺深紅似錦散影在滄浪

茶溪

茶林那復有零落付樵人舊日溪邊叟空悲二月春

仙鶴亭

杳杳雲閒路重重隔翠林數聲清夜後來伴月邊吟

芙蓉塘

一發連千丈紅雲出素波秋風吹欲老無奈落花何

白苧橋

徧隴敷青綠桑麻共幾家滿城羅綺子應笑不栽花

漁渚

野水連天闊滄波引釣緝寄言溪上叟莫學直鉤人

學海類編  
懷蘇亭

猶使樽前客常懷沒後名好風吹遠籟如有笑歌聲  
附考亭在府治東子城上宋建與蘇小墓相望故名  
後改曰朝陽樓

披雲閣

茲樓當勝地高望極峻嶒欲覩青天色還須上一層  
附考閣與懷蘇亭相近宋知州方滋建後改名風月  
無邊樓

景龍樓

千秋傳異綵百尺護雕闌欲識金龍瑞丹霄試仰看  
附考樓卽東塔寺東廡鐘樓也宋孝宗父子僂調爲  
嘉興縣丞生孝宗幼時登樓墮地左右失色孝宗屹  
然不動寺僧先夕夢金龍挂于樓角因名事詳揮塵  
錄

烟雨樓

妙手誰烘染梳烟沐雨姿一聲長笛晚人在倚樓時  
附考樓舊在郡城東南澎湖之濱五代時吳越王錢  
元璿建宋嘉定中王希呂重修元季毀明嘉靖閒知

府趙瀛濬內隍淤土移填湖中構樓五楹兵憲沈奎  
復闢其後爲釣鼇磯遂爲南湖之勝又名疑樓八景  
之一曰春波烟雨

月波樓

天闊冰壺淨溪平玉鑑寒卷簾看晚色鷗鳥竝闌干  
附考樓在郡西北城上宋元祐中知州令狐挺建政  
和中毛滂重修有記下瞰金魚池唐刺史丁廷贊養  
金鯽于此又張能臣名酒記日月波秀州酒名又宋  
詞吹笛月波樓下有何人知得八景之一曰月波秋

霽

真如院

田家輕脫屣聊結淨人緣影外香燈寂清風百世傳

附考院在郡城南四里屬秀水唐至德中裴休捨宅  
爲至德院雪峰和尚結庵其中宋改真如院明洪武  
時定爲教寺今仍之內有雪峰井長水塔裴相清輝  
堂綵雲橋柏屏龍槐石梅纓絡松東坡煮茶亭諸景  
司馬光有記

雪峰庵

學海類編 卷之七 遊覽  
一語合頭悟師承豈在身戲言廬墓客未是報恩人

景德禪院

白毫光未滅勝事百年中好是傳燈地林泉有古風  
附考院在郡城西去秀水治三里宋建炎中建初寺  
基下有白龍潭多風濤晴霽時有白光三道僧行雲  
積土填之造三塔東坡過此畫竹于壁與李甲俱有

詩另見

三塔

石匱埋神物靈光照夜多龍歸天上後無復更風波

學繡塔

孤塔岩嶢立猶傳學繡人五湖如好在針線不勝春  
附考塔在三塔西二里相傳西施入吳學繡于此

水陸院

白晝重門寂蒼苔古殿深老僧香火罷松柏夜森森  
附考院在郡治西北一里晉興甯閒哀帝詔剡山法  
師竺潛講般若于禁中還止樵李貴人家因捨宅爲  
寺梁天監中盛行水陸法事號水陸院宋賜名祥符

泗洲庵

舊寺邱墟後重興歲月賒莫將閒禍福容易託僧伽  
附考卽今東塔寺在郡城東六里漢朱買臣故宅也  
梁天監中建隋仁壽閒置塔宋元豐時賜名泗洲大  
聖塔院政和六年名壽聖教院孝宗以潛邸改賜東  
塔廣福教院明洪武中定爲今額內有景龍樓青白  
二池聽玉軒朱買臣墓

雲門家舍

滿篋藏鋒句家傳世幾何遠孫無悟解卻笑葛藤多  
附考雲門大師係嘉興人詳方外

白蓮上方

古屋深於洞門前種白蓮好尋當日社重結此生緣  
附考寺在郡城東八里舊名接待院後廢爲趙倅雋  
之錦莊宋紹興二年重建洪武初定爲講寺元季劉  
伯溫館于其中

普濟院

祇應會布地往往化爲魚一遇丁千騎禪人便結廬  
附考院在秀水

兜率寺

學海類編 卷之二十一  
昔年池滿地今見屋眈眈不結蓮花界龜魚死未甘  
附考寺在秀水

姜庵

不入紅塵市安居三十年至今庵下路芳草碧芊芊  
附考庵在秀水

惠明堂

地僻無人到松風鶴夢清一燈禪榻畔自向暗中明  
附考堂在嘉興

三過堂

題詩三過此坡老昔時曾悟得成彈指來爲打睡僧

附考堂在郡城西二十七里本覺寺中屬秀水舊名  
報本禪院宣和中改爲神霄玉清萬壽宮淳祐閒請  
爲本覺禪院蘇軾與文長老善守杭之明年有事于  
潤一過題詩後六年自徐移湖再過則長老退院又  
十年除龍圖學士知杭州三過則長老已卒皆有詩  
後人因建堂內有樵李亭空翠亭四圍竹十餘畝八  
景之一曰空翠風煙俱另見

寂照菴

寂滅跏趺地燈光照四時高僧穿地脈此意少人知

附考菴舊屬郡境後析桐鄉在縣東南二十里千金

鄉屠甸邨晉天福八年建名報恩院宋治平閒改寂

照院相傳二石佛海中浮至寺西有石人涇寺僧溫

日觀善畫蒲萄

天慶觀

寥陽龍已化華表鶴空悲欲問梁朝事惟應老檜知

附考觀在府治西北一里有七賢遺迹一嚴陵燭炤

二蹇子虔山水三葛洪書額四吳道子貌真五張僧

繇鷹六顧虎頭神七飛仙又有唐開元鐘梁朝檜七

寶上帝像宋推官解九皋井銘今觀址改建城隍廟

福順廟

老屋無丹牖空階只翠苔遶檐看箭鏃誰記赤眉來

附考廟在嘉興治西南五里唐咸通中建祀隋司徒

陳果仁封忠烈公

昌武廟

祇因吳士季千載仰公神欲借驅痞術來臨刻木人

附考廟舊屬郡境後析桐鄉在阜林鎮吳士季為吳

興令病疴遣人就此乞驅鬼遂夢一騎縛小鬼去卽  
愈宋志淮海王有三子皆有功于民因祀爲土穀神  
阜林爲大龍翔爲二爐鎮爲三云

楊姑廟

孝德襄陵久天然與眾殊生男不能養應合愧楊姑

附考廟在嘉興縣西宋楊孝女躬耕養親鄉人祠之

徐偃王廟

王有岐夷德千年貌亦存我懷三刺史誰是後來孫

附考廟在郡西北二十里偃王逃之會稽遺廟在焉

旁有墳屬秀水

曹史君祠

一笑淮兵卻功成未易論豈慚顏刺史詩酒在平原

附考祠在府治西北祀吳越時牧守曹信及其子珪

珪爲嘉興都將守城以拒淮人民懷其德立祠祀之

高使君祠

一暝移藩日邦人昔被恩步兵碑尙在功業敢經綸

附考祠在嘉興治北三十六里嘉善治西北十里使

君逸其名晉建武中爲嘉興監屯校尉鎮靜其民終

于此立祠祀之梁步兵校尉劉績之爲記

### 寥陽殿

人歸天上去空識舊衣冠祕錄藏金匱清風滿殿寒

附考殿在秀水有葛洪書碑後爲郡幕解九皋取去

### 霍將軍廟

弼漢功非淺讒夫可奈何海神今亦畏安敢布風波

附考廟在郡城東南二十七里石佛寺旁祀漢霍光

三吳濱海皆有祠又平湖亦有廟另見題咏

讀書堆

一作唐詢詩

平林標大道曾是野王居往事將誰語淒涼六代餘

附考嘉興縣東六里有顧節墩平湖東沸上有顧書

堵俱野王讀書處也野王店在顧亭林舊屬海鹽境

後晉天福庚子亭林寶雲寺壞于水僧夢二青衣來

云梁持節至俄一人紫衣金魚儀狀秀整曰此吾故

宅汝建寺立像吾當護之有水際古碑可據也明日

獲碑字皆磨滅惟存數字云寺南高墓顧野王曾于

此修輿地志云

### 簡齋

詩老追唐句閒居築簡齋芙蓉寒浦外紅落感秋懷  
附考齋爲陳與義所築舊屬郡境後析桐鄉在青鎮  
廣福院後芙蓉浦上又有南軒三友亭諸勝後趙子  
昂作古篆顏曰簡齋讀書處

陳賢良隱居

發策名猶在回頭事已非池塘春草綠空憶謝公歸  
附考嘉興治東北二里爲舜俞宅崇甯三年其孫捨  
基爲漏澤寺其隱居在清風涇析屬嘉善卽宋史所  
載白牛邨別業也

徐長者園

丹砂猶未就白髮忽成翁卻有憐春意栽花向此中  
附考園在嘉興長者宋人學道年八十治圃栽花老  
于此

趙老園

藏書幾萬卷歸老此林泉不爲尋尊鱸于公亦有賢  
附考園在郡城西三里景德寺後析屬秀水乃宋致  
政殿丞趙公歸隱藏書之處公名袞字希甫陳舜俞  
題曰趙老園

施墓

蒼苔侵壞道晚雀散空林莫問人賢否浮生一古今  
附考墓在嘉興治東二十里圖經云齊長沙王府長  
史施修琳墓

衛墓

惆悵黎陽客飄流浙水濱定忘空腹恨知是赤心人  
附考墓在嘉興治西南圖經云衛大夫洪演墓也衛  
懿公爲狄人所滅食其肉惟肝在地演剖已腹而內  
焉

劉伶墓

荷鋪從吾後叮嚀死便埋人皆譏嗜酒我獨愛忠懷  
附考墓在府城東二十七里胥山下俗呼金伶墓蓋  
避吳越王諱也屬嘉興又胥山有荷鋪翁墓

嚴忌墓

有子如君少終緣叛國亡冢前無後嗣切勿怨張湯  
附考墓在郡城西北二十七里新城鎮屬秀水子助  
葬由拳在天甯寺後俗呼後嚴墩蓋以忌爲前嚴助  
爲後嚴也

朱買臣墓

世事春風轉榮枯一夢閒繡衣人不見孤冢舊家山  
附考墓在郡城東三里東塔寺中

周都官墓

不識君名字應難問子孫一邱浮水際神怪欲誰論  
附考墓在秀水治西北水中旱不加高潦不加沒今  
尚存

蘇小小墓

泉下骨應朽幽魂獨未消幾番清夜月孤影度南橋

附考墓在嘉興治西南六十步有片石在通判廳曰  
蘇小小墓南有賢娼巷寰宇記云墓高三尺有大井  
在其側舊生雙桃于上方輿勝覽亦云

羞墓

傷哉負薪子五十始登朝空使埋羞處山花復採樵  
附考墓在郡城北十八里買臣妻葬處又曰羞涇又  
作楸涇

木紋觀音

雙瞳分日月眉際一星懸照見人間苦三辰不在天

附考唐咸通閒郡中有木在水濟人遇淨則浮逢羶則沈人知其異取鐫觀音像纔畢面目手指皆有光采人稱木紋觀音又作日紋初在五臺院後以兵火移精嚴寺東廡紹興十一年邦人禱賜重新其字先是郡守曾侯曾夢白衣人曰我當此方致雨奈面目不淨三十里無所見不能與眾聖會明日詰之果匠者用雞子牛膠調粉故爾遂改新之乃應

邦藥王龕

父老懷遺愛誰傳肘後方藥囊同日葬空憶紫元香

附考在嘉興

淨相佳李

地重因名果如分沆瀣漿傷心吳越戰未敢盡情嘗

附考淨相寺在郡城東南三十六里梁武時建地產佳李樛李之名由此

符姥瑞竹

一幅霜縑外青青出自然天機何敢議珍重白衣仙

附考在郡城

嘉禾百咏

一 嘉禾百咏 嘉禾百咏 嘉禾百咏 嘉禾百咏 嘉禾百咏

嘉禾百咏

嘉禾百咏

嘉禾百咏

嘉禾百咏

嘉禾百咏

嘉禾百咏終

